

C40
4514
136





C40-4514



64853





皇圖鞏固
帝衢遐昌
佛日增輝
法輪常轉

十地經論序

侍中崔光撰

十地經者蓋是神覺之玄苑靈慧之妙宅億善之基
輿萬度之綱統理苞羣藏之祕義冠衆典之奧積漸
心行窮忍學之源崇廣任德極道慧之府所以厚集
肇慮朗成圓種離怖首念赫爲雷威其爲教也微密
精遠究淨照之宗融冶瑩練盡性靈之妙自寂場啓
旭固林輟暉雖復聖訓充感金言滿世而淵猷沖蹟
莫不網羅於其中矣至於光宣真軌融暢玄門始自
信仁終泯空寂因果旣周化業彌顯嘿耀大方影煥

八極豈直日月麗天洞燭千象溟壑帶地混納百川
而已哉既理富瀛岳局言靡測廓明洪旨是係淵儒
北天竺大士婆藪槃豆此云天親挺高悟於像運拔
英規於季俗故能徽蹤馬鳴繼跡龍樹每恨此經文
約而義豐言邇而旨遠乃超然遐慨邈爾悠想慕釋
迦之餘範追剛藏之遺軌誠復歲踰五百處非六天
人梵乖遼正像差迥而妙契寰中神協靡外通法貫
玄莫愧狂列遂乃准傍大宗爰製茲論發趣精微根
由睿哲旨奧音殊宣譯俟賢固以義囑中興時憑聖
代大魏皇帝儁神天疑玄情漢遠揚治風於宇縣之

外敷道化於千載之下每以佛經爲遊心之場釋典
爲栖照之囿搜隱訪缺務乎昭揚有教必申無籍不
備以永平元年歲次玄枵四月上日命三藏法師北
天竺菩提留支此云道希中天竺勒那摩提此云寶
意及傳譯沙門北天竺伏陀扇多并義學緇儒一十
餘人在太極紫庭譯出斯論十有餘卷所二三藏並
以邁俗之量高步道門羣藏淵部罔不研覽善會地
情妙盡論旨皆手執梵文口自敷唱片詞隻說辯詰
蔑遺于時皇上親紆玄藻飛輪輪首臣僚僧徒毘贊
下風四年首夏翻譯周訖洋洋疊疊莫得其門義富

趣玄執云窺測剛藏妙說更興於像世天親玄旨再
光於季運忝廁末筵敢竊祇記耳

十地經論卷第一

天 親 菩 薩 造

元魏三藏法師菩提留支奉詔譯

○初歡喜地第一之一

說此法門者 及諸勸請法 分別義藏人

受持流通等 法門等最勝 頂禮解妙義

欲令法久住 自利利他故

△十地法門初地所攝八分一序分二三昧分三

加分四起分五本分六請分七說分八校量勝

分

經曰如是我聞一時婆伽婆成道未久第二七日在
他化自在天中自在天王宮摩尼寶藏殿與大菩薩
衆俱一切不退轉皆一生得阿耨多羅三藐三菩提
從他方佛世界俱來集會此諸菩薩一切菩薩智慧
境界悉得自在一切如來智慧境界悉皆得入勤行
不息善能教化一切世間隨時普示一切神通等事
於剎那中皆能成辦具足不捨一切菩薩所起大願
於一切世一切劫一切國土嘗修一切諸菩薩行具
足菩薩福德智慧如意神足而無窮盡能爲一切而
作饒益能到一切菩薩智慧方便彼岸能令衆生皆

世間道向涅槃門不斷一切菩薩所行善遊一切菩
薩禪定解脫三昧神通明慧諸所施爲善能示現一
切菩薩無作自在如意神足皆悉已得於一念頃能
至十方諸佛大會勸發諮請受持一切諸佛法輪嘗
以大心供養諸佛嘗能修習諸大菩薩所行事業其
身普現無量世界其音徧聞無所不至其心通達明
見三世一切菩薩所有功德具足修習如是諸菩薩
摩訶薩功德無量無邊於無數劫說不可盡其名曰
金剛藏菩薩寶藏菩薩蓮華藏菩薩勝藏菩薩蓮華
勝藏菩薩日藏菩薩月藏菩薩淨月藏菩薩焰一切

世間莊嚴藏菩薩智慧普照明藏菩薩妙勝藏菩薩
栴檀勝藏菩薩華勝藏菩薩俱素摩勝藏菩薩優鉢
羅華勝藏菩薩天勝藏菩薩福德勝藏菩薩無礙清
淨智藏菩薩功德藏菩薩那羅延德藏菩薩無垢藏
菩薩離垢藏菩薩種種樂說莊嚴藏菩薩大光明網
照藏菩薩淨明勝照威德王藏菩薩大金山淨光明
威德王藏菩薩一切相莊嚴淨勝藏菩薩金剛燄勝
宵相莊嚴藏菩薩燄熾藏菩薩宿王光照藏菩薩虛
空庫無礙智藏菩薩無礙妙音遠藏菩薩陀羅尼功
德持一切世間願藏菩薩海莊嚴藏菩薩須彌勝藏

菩薩淨一切功德藏菩薩如來藏菩薩佛勝藏菩薩
解脫月菩薩如是等菩薩摩訶薩無量無邊阿僧祇
不可思議不可稱不可量無有分齊不可說不可說
種種佛國土集金剛藏菩薩而爲上首

論曰時處等校量顯示勝故此法勝故在於初時
及勝處說此處宮殿等勝是名處勝何故不色界
說此處感果故何故不初七日說思惟行因緣行
故本爲利他成道何故七日思惟不說顯示自樂
大法樂故何故顯已法樂爲令衆生於如來所增
長愛敬心故復捨如是妙樂悲愍衆生爲說法故

何故唯行因緣行是因緣行顯是不共法故何故
菩薩說此法門爲令增長諸菩薩力故何故唯金
剛藏說一切煩惱難壞此法能破善根堅實猶如
金剛故不異名說何故名金剛藏藏卽名堅其猶
樹藏又如懷孕在藏是故堅如金剛如金剛藏是
諸善根一切餘善根中其力最上猶如金剛亦能
生成人天道行諸餘善根所不能壞故名金剛藏
已說序分次說三昧分

經曰爾時金剛藏菩薩摩訶薩承佛威神入菩薩大
乘光明三昧

論曰入三昧者顯示此法非思量境界故已說三
昧分次說加分

經曰爾時金剛藏菩薩入是菩薩大乘光明三昧卽
時十方過十億佛土微塵數等諸佛世界有十億佛
土微塵數諸佛皆現其身同名金剛藏是諸佛如是
讚言善哉善哉金剛藏乃能入是菩薩大乘光明三
昧復次善男子如是十方十億佛土微塵數等諸佛
皆同一號加汝威神此是盧舍那佛本願力故加
論曰何故多佛加顯法及法師增長恭敬心故何
故同號金剛藏加本願力故何故如來作如是願

顯示多佛故此三昧是法體本行菩薩時皆名金剛藏同說此法今成正覺亦名金剛藏故不異名加又是菩薩聞諸如來同已名已增踊悅故何故不言過無量世界方便顯多佛故何故定言十億佛土爲說十地故此經如是多說十數彼佛先作是願今復自加後餘佛加故言盧舍那佛本願力故加何故加爲說此法故加復云何加

經曰又一切菩薩不可思議諸佛法明說今入智慧地故攝一切善根故善分別選擇一切佛法故廣知諸法故善決定說諸法故無分別智清淨不雜故一

切魔法不能染故出世間法善根清淨故得不可思議智境界故乃至得一切智人智境界故又得菩薩十地始終故如實說菩薩十地差別方便故念隨順一切佛法故觀達分別無漏法故善擇大智慧光明方便故令入具足智門故隨所住處正說無畏辯才明故得大無礙智地故憶念不忘菩提心故教化成就一切衆生界故得通達分別一切處法故

論曰此二十句依一切菩薩自利利他故加如是初十句依自利行後十句依利他行是中一切菩薩者謂住信行地不可思議諸佛法者是出世間

道品明者見智得證說者於中分別入者信樂得證智慧地者謂十地智如本分中說此是根本入如經又一切菩薩不可思議諸佛法明說令人智慧地故此修多羅中說依根本入有九種入一者攝入聞慧中攝一切善根故如經攝一切善根故二者思議入思慧於一切道品中智方便故如經善分別選擇一切佛法故三者法相入彼彼義中無量種種智故如經廣知諸法故四者教化入隨所思義名字具足善說法故如經善決定說諸法故五者證入於一切法平等智見道時中善清淨

故如經無分別智清淨不雜故菩薩教化衆生卽是自成佛法是故利他亦名自利六者不放逸入於修道時中遠離一切煩惱障故如經一切魔法不能染故七者地地轉入出世間道品無貪等善根淨故如經出世間法善根清淨故復有善根能爲出世間道品因故八者菩薩盡入於第十地中入一切如來祕密智故如經得不可思議智境界故九者佛盡入於一切智入智故如經乃至得一切智人智境界故是諸入爲校量智義差別次第轉勝非根本入一切所說十句中皆有六種差別

相門此言說解釋應知除事事者謂陰界入等六
種相者謂總相別相同相異相成相壞相總相者
是根本入別相者餘九入別依止本滿彼本故同
相者入故異相者增相故成相者略說故壞相者
廣說故如世間成壞餘一切十句中隨義類知第
二十句所謂得菩薩十地始終故此根本始終是
中始者信欲親近等終者念持諸地復有阿含及
證如是次第依初相應知依根本始終有十種始
終一者攝始終思慧智隨所聞義受持說故如經
如實說菩薩十地差別方便故二者欲始終令證

一切佛法故如經念隨順一切佛法故三者行始
終觀分時中無漏道品分別修相覺故如經觀達
分別無漏法故四者證始終見道時中法無我智
方便故如經善釋大智慧光明方便故是中善釋
者擇中最勝最勝者法無我智故大智慧者過小
乘故光明者對治無明故此事中彼時中皆善知
故五者修道始終出世間智智力得入法義故如
經令入具足智門故此處菩薩於菩提有五種障
一者不能破諸邪論障已說正義他言能壞復眷
屬離散二者不能答難障於他問中茫然無對設

有言說人不信受三者樂著小乘障自不能得大
菩提復捨利益衆生四者化衆生懈怠障於中捨
利他行不助他善復自善根不增長故五者無方
便智障不能善化衆生復自菩提行不滿足故對
治是障有五始終一者能被邪論障始終隨彼所
著顯已正義對治邪執無畏辯才性不闇故如經
隨所任處正說無畏辯才明故二者能善答難始
終證大無礙智地故如經得大無礙智地故三者
樂著小乘對治始終大菩提願大菩提念不忘失
故如經憶念不忘菩提心故四者化衆生懈怠對

治始終利益衆生無疲倦故如經教化成就一切
衆生界故五者無方便智對治始終於五明處通
達分別故如經通達分別一切處法故已說何故
加復云何加謂口意身加云何口加

經曰復次善男子汝當辯說此諸法門差別方便法
故承諸佛神力如來智明加故自善根清淨故法界
淨故饒益衆生界故法身智身故正受一切佛位故
得一切世間最高大身故過一切世間道故出世間
法道清淨故得一切智人智滿足故

論曰此十句中辯才者隨所得法義憶持不忘說

故諸法門者謂十地法差別者種種名相故此法
善巧成是故名方便依根本辯才有二種辯才一
者他力辯才二者自力辯才他力辯才者承佛神
力故云何承佛神力如來智力不闍加故如經承
諸佛神力如來智明加故自力辯才者有四種一
者有作善法淨辯才如經自善根清淨故二者無
作法淨辯才如經法界淨故三者化衆生淨辯才
如經饒益衆生界故四者身淨辯才是身淨中顯
三種盡一者菩薩盡有二種利益二者聲聞辟支
佛不同盡三者佛盡菩薩盡者法身離心意識唯

智依止如經法身智身故二種利益者現報利益
受佛位故後報利益摩醯首羅智處生故如經正
受一切佛位故得一切世間最高大身故二乘不
同盡者度五道復涅槃道淨故如經過一切世間
道故出世間法道清淨故佛盡者入一切智智滿
足故如經得一切智人智滿足故自力辯才校量
轉勝上上故已說口加云何意加

經曰爾時諸佛與金剛藏菩薩真實無畏身與無障
礙樂說辯才與善淨智差別入與善憶念不忘加與
善決定意方便徧至一切智處與諸佛不壞力與

如來無所畏不怯弱與一切智人智無礙分別法正見與一切如來善分別身口意莊嚴起故

論曰此十句意加無畏身者有二種一者與無上勝威德身如王處衆自在無畏二者與辯才無畏身前色身勝後名身勝是名身有九種一者不著辯才說法不斷無滯礙故如經與無障礙樂說辯才故二者堪辯才善淨堪智有四種一者緣二者法三者作四者成善知此義成不成相故如經與善淨智差別入故三者任放辯才說不待次言辭不斷處處隨意不忘名義故如經與善憶念不忘

加故是不忘加意力加故四者能說辯才隨所應度種種譬喻能斷疑故如經與善決定意方便故五者不雜辯才三種同相智嘗現前故如經與徧至一切智處故六者教出辯才得佛十力不壞於可度者令斷煩惱故如經與諸佛不壞力故七者不畏辯才得佛決定無畏於他言說不怯弱故如經與如來無所畏不怯弱故八者無畏辯才於一切智隨順宣說修多羅等法六種正見故如經與一切智人智無礙分別法正見故九者同化辯才得一切佛無畏身等三種教化隨所度者顯示殊

勝三業神化故如經與一切如來善分別身口意
莊嚴起故又諸佛有力有慈悲何故以十種無畏
身唯加金剛藏而不加餘者六重五畏故破經
經曰何以故以得菩薩大乘光明三昧法故亦是菩
薩本願起故善淨深心故善淨智圓滿故善集助道
法故善修本業故念持無量法故信解清淨光明法
故善得陀羅尼門不壞故法界智印善印故不與
論曰以是菩薩得大乘光明三昧法餘者不得故
得三昧法有二種一者本願成就現前故如經亦
是菩薩本願起故二者三昧身攝功德故此三昧

身攝功德有八種依自利利他故一者因淨深心
趣菩薩地盡清淨故如經善淨深心故深心者信
樂等復是一切善法根本故二者智淨趣菩薩地
盡修道真如觀智故如經善淨智圓滿故此真如
觀內智圓滿普照法界猶如日輪光徧世界故三
者身轉淨生生轉勝善行成滿故如經善集助道
法故四者心調伏淨善斷煩惱習故如經善修本
業故五者聞攝淨堪能受持一切如來所說祕密
法故如經念持無量法故六者通淨得勝通自在
故如經信解清淨光明法故以決定信力攝取通

故七者辯才淨善知陀羅尼門不相違故如經善
得陀羅尼門不壞故於中所有初章字者是陀羅
尼門一字門攝持無量名句字身故不壞者前
後不相違故八者離慢淨謂真實智教授不異故
如經法界智印善印故於中三昧身攝功德有四
種依自利因善淨深心故善淨智圓滿故善集助
道法故善修本業故此修多羅中四句次第說精
進因不忘因勢力因彼不染因復依利他因有四
種念持無量法故斷疑因信解清淨光明法故敬
重因以神通力示現不思議處令諸見者決定信

入故善得陀羅尼門不壞故轉法理因法若壞時
假餘尊法誦持故法界智印善印故教授出離因
如是化者得自利不忘故已說意加云何身加摩
頂覺故

經曰爾時十方諸佛不離本處以神通力皆伸右手
善摩金剛藏菩薩摩訶薩頂

論曰不離本處而摩此者顯示殊勝神力若來此
處則非奇異是如意通力非餘通等已說加分云
何起分

經曰諸佛摩金剛藏菩薩頂已爾時金剛藏菩薩即

從三昧起

論曰卽從三昧起者以三昧事訖故又得勝力說時復至定無言說故已說起分云何本分

經曰起三昧已告諸菩薩言諸佛子是諸菩薩願善決定無雜不可見廣大如法界究竟如虛空盡未來際覆護一切衆生界佛子是諸菩薩乃能入過去諸佛智地乃能入未來諸佛智地乃能入現在諸佛智地諸佛子此菩薩十地是過去未來現在諸佛已說今說當說我因是事故如是說何等爲十一名歡喜地二名離垢地三名明地四名燄地五名難勝地六

名現前地七名遠行地八名不動地九名善慧地十名法雲地諸佛子此菩薩十地過去未來現在諸佛已說今說當說佛子我不見有諸佛世界是諸如來不嘆說此菩薩十地者何以故此是菩薩摩訶薩增上勝妙法故亦是菩薩光明法門所謂分別十地事諸佛子此事不可思議所謂菩薩摩訶薩諸地智慧論曰何故不請而說若不自說衆則不知爲說不說又復不知欲說何法願善決定者如初地中說發菩提心卽此本分中願應知善決定者真實智攝故善決定者卽是善決定此已入初地非信地

論
所攝此善決定有六種一者觀相善決定真如觀
一味相故如經無雜故二者真實善決定非一切
世間境界出世間故如經不可見故三者勝善決
定大法界故一切佛根本故如經廣大如法界故
大勝高廣一體異名法相義故一切法法爾故復
法界大真如觀勝諸凡夫二乘智等淨法法爾故
復法界大方便集地謂說大乘法法爾故復法界
大白法界善法法爾故四者因善決定有二種一
成無嘗愛果因善決定是因如虛空依是生諸色
色不盡故如經究竟如虛空故二嘗果因善決定

得涅槃道如經盡未來際故五者大善決定隨順
作利益他行如經覆護一切衆生界故次前善決
定此願世間涅槃中非一向住故六者不怯弱善
決定入一切諸佛智地不怯弱故如三佛子諸菩
薩乃至入現在諸佛智地故復此十地生成佛智
住持故如經諸佛子是此菩薩十地是過去未來
現在諸佛已說今說當說故於中善決定者是總
相餘者是別相同相者善決定異相者別相故成
相者是略說壞相者廣說故如世界成壞何故定
說菩薩十地對治十種障故何者十種一者凡夫

我相障二者邪行於衆生身等障三者闇相於聞
思修等諸法忘障四者解法慢障五者身淨我慢
障六者微煩惱習障七者細相習障八者於無相
有行障九者不能善利益衆生障十者於諸法中
不得自在障何故十地初名歡喜乃至十名法雲
成就無上自利利他行初證聖處多生歡喜故名
歡喜地離能起誤心犯戒煩惱垢等清淨戒具足
故名離垢地隨聞思修等焰法顯現故名明地不
忘煩惱薪智火能燒故名燄地得出世間智方便
善巧能度難度故名難勝地般若波羅蜜行有聞

大智現前故名現前地善修無相行功用究竟能
過世間二乘出世間道故名遠行地報行純熟無
相無間故名不退地無礙力說法成就利他行故
名善慧地得大法身具足自在故名法雲地如是
受法王位猶如太子於諸王子而得自在是處有
微智障故不自在對治此障故說佛地又如孕在
藏菩薩十地亦復如是以諸地有障故如子生時
佛時亦爾事究竟故又如生時諸根覺了佛亦如
是於一切境界智明了故藏有十時一者陀羅婆
身時二者捍羅婆身時三者尸羅他身時四者堅

身時五者形相似色身時六者性相似身時七者
業動身時八者滿足身時於中有三種根滿足時
男女相別滿足時廣長諸相滿足時如是十時諸
地相似故佛子我不見有諸佛世界是諸如來不
歎說此菩薩十地者顯此勝法爲令時衆增渴仰
故佛世界者於中成佛喻如稻田往作佛事者亦
名佛世界歎說者於中有二種一者爲說阿含義
二者爲證入義摩訶薩者有三種大一願大二行
大三利益衆生大勝妙法者諸法門中最殊勝故
光明者此大乘法顯紹一切餘法門故法門者名
道故已說本分云何請分

爲法故分別十地事者顯示世間智所知法故是
事不可思議所謂菩薩摩訶薩諸地智慧者顯示
出世間智故非此世間分別地智能成菩薩清淨
道故已說本分云何請分
經曰爾時金剛藏菩薩說諸菩薩十地名已默然而
住不復分別是時一切菩薩衆聞說菩薩十地名已
咸皆渴仰欲聞解說各作是念何因何緣是金剛藏
菩薩說諸菩薩十地名已默然而住不更解釋時大
菩薩衆中有菩薩名解脫月知諸菩薩心深生疑已
卽以偈頌問金剛藏菩薩曰

何故淨覺人 念智功德具 說諸上妙地
 有力不解釋 決定此一切 菩薩大名稱
 何故說地名 而不演其義 此衆皆樂聞
 佛子智無畏 如是諸地義 願爲分別說
 此衆皆清淨 離懈怠嚴淨 安住堅固中
 功德智具足 迭共相瞻任 一切咸恭敬
 如蜂欲熟蜜 如渴思甘露
 論曰何故默然任欲令大衆渴仰請說故復增菩薩
 尊敬法故何故解脫月菩薩初請彼衆上首故
 餘問則亂衆調伏故何故偈頌請少字攝多義故

諸讚歎者多以偈頌故此五偈說何等義顯示說
 者聽者無諸過故若有過者則不應說是中顯示
 說者淨覺無過故復顯聽者同法決定故有樂聞
 故復示餘者淨心故又顯此衆皆堪聞法故偈言
 迭共相瞻任故云何歎說者偈言 示瞻任二
 何故淨覺人 念智功德具 說諸上妙地
 何有力不解釋
 何故唯歎淨覺淨覺是說因故覺名覺觀是口言
 行有淨說因何故不說歎淨覺有二種一攝對治
 二離諸過是中念智具者攝對治故所治有二種

一者雜覺二者雜覺因憶想分別故念者四念處對治雜覺故智者真如無相智對治雜覺因憶想分別故餘者顯示離諸過是過有三種有三過者則不能說何者爲三一慳嫉二說法懈怠三不樂說慳者其心恪法嫉者忌他勝智功德具者不瞋等功德具示無初過故說上地者示無第二過故有力者示無第三過故如是二種淨覺歎說者已次歎聽者偈言

決定此一切 菩薩大名稱 何故說地名
而不演其義

決定者點慧明了故決定有三種一上決定願大菩提故二名聞決定他善敬重故三攝受決定彼說者善知故偈言菩薩故大名稱故說地名故如是次第應知雖有決定堪受法器心不欲聞亦不得說偈言

此衆皆樂聞 佛子智無畏 如是諸地義
願爲分別說

決定者是有阿含決定非證決定有非現前決定無現前決定如是決定法器不滿足故不能聽受示現此衆具足決定故能聽受偈言佛子智無

畏故智有二種一證法故二現受故如是善知法
器滿足請金剛藏如是諸地義願爲分別說已嘆
同法衆決定樂聞功德次復歎異衆偈言

此衆皆清淨 離懈怠嚴淨 安任堅固中
功德智具足

清淨者不濁故濁有六種離此諸濁故言清淨何
者爲六一不欲濁二威儀濁三蓋濁四異想濁如
勝心破壞心故五不足功德濁善根微少故是故
於彼說中心不樂任六癡濁謂愚闇等故此對治
有六種不濁安任堅固者於所說法修行堅固如

是次第相對離懈怠者對不欲濁嚴者對威儀濁
淨者對蓋濁堅固者對異想濁功德具者對不足
功德濁智具者對癡濁此六句示現是二偈顯同
生衆淨次一偈顯異生衆淨後一偈顯二衆清淨
偈言

迭共相瞻任 一切咸恭敬 如蜂欲熟蜜
如渴思甘露

迭共相瞻者示無雜染心故咸恭敬者示敬重法
非妬心故下半偈喻敬法轉深此偈迭共相瞻是
總相一切咸恭敬是別相如是餘偈初句總相餘

句別相同異成壞如上所說偈言

大智無所畏 金剛藏聞已 欲令大衆悅

卽時說頌言 難第一希有 菩薩所行示

地事分別上 諸佛之根本 微難見離念

非心地難得 境界智無漏 若聞則迷悶

持心如金剛 深信佛智慧 心地無我智

能聞智微細 如彩畫虛空 如虛空風相

智如是分別 難見佛無漏 我念佛智慧

第一世難知 難信希有法 是故我默然

論曰此初偈中欲令大衆悅是總正訓答相訓答有二

種一堪訓答二不怯弱訓答偈言大智故無所畏

故離不堪答離不正答此二示現自他無過故何

者是正答相此法難說復難聞故云何難說偈言

難第一希有 菩薩所行示 地事分別上

諸佛之根本

難者難得故難有二種一最難二未曾有難偈言

第一故希有故此二示現所說難何者是難偈言

菩薩所行示地事分別上菩薩行者是出世間智

示者顯示故地事者謂諸地菩薩行事分別上說

勝故何者菩薩行偈言諸佛之根本佛者覺佛智

故已說當說復說所以難何者是難彼菩薩行事
義住不可如是說云何彼義住偈言

微難見離念 非心地難得 境界智無漏

若聞則迷悶

此偈中難得者是總餘者是別難得者難證故是
難得有四種一微難得二難見難得三離念難得
四非心地難得微難得者非聞慧境界故麤事不
須思惟難見難得者非思慧境界故離念難得者
非世間修慧境界故示現三界心心數法分別世
間修道智非境界故非心地難得者示現報生善

得修道智非境界故此示現心境界者是心地此
誰境界偈言智境界何者是智見實義故何故非
餘境界無漏故無漏者出世間義是義非世間智
境界如是甚深義如是可解如是不可說若闕則
迷悶者云何迷悶隨取卽聞非是不聞已辯說復
顯難聞偈言

持心如金剛 深信佛智慧 心地無我智

能聞智微細

如金剛者堅如金剛堅有二種一決定信堅二證
得堅此二句示現堅者是總餘者是別云何深信

佛智慧唯佛所知非我境界佛菩提無邊佛化衆
生所說法門種種信故何者是心地云何無我智
心地者隨心所受三界中報又隨心所行一切境
界亦名心地無我智者有二種我空法空如實知
故能聞智微細者難知如是微細如前所說復以
譬喻顯微細義偈言

如彩畫虛空 如虛空風相 智如是分別

難見佛無漏

此偈示現如虛空畫色如壁是中不住故不可見
如空中風如樹葉是中不住故不可見此動作者

非不空中有是二事如是虛空處事不可說處是
畫風如說以非自性不可得見是不住故以其容
故非不於中有此言說如是佛智言說顯示地校
量勝分別難見畫者喻名字句身何以故依相說
故風者以喻音聲說者以此二事說聽者以此二
事聞若如是可說如是可聞如是難見何故不說
我念佛智慧 第一世難知 難信希有法
是故我默然
難知者難證故難信者難生決定心故此偈示現
有證有信可說可聞世間難得證信故我不說

經曰爾時解脫月菩薩聞說此已請金剛藏菩薩言
佛子是大菩薩善淨衆集善清淨深心善清淨諸念
善集諸行多親近諸佛善集助道法具足無量功德
離癡疑悔無有染污善任深心信於佛法中不隨他
教善哉佛子敷演此義是諸菩薩如是深法皆能證

知

論曰聖者解脫月何故復嘆此衆上言世間證信
者難得示現此衆有堪能故善淨深心者是總此
善淨深心有二種一阿含淨二證淨是阿含淨有
五種一者欲淨隨所念阿含得方便念覺淨如經

善清淨諸念故二者求淨得隨順身口敬行如經
善集諸行故三者受持淨於無量世多聞憶持不
謬故如經多親近諸佛故四者生得淨願得上上
生勝念勝如經善集助道法故五者行淨求善證
法習少欲頭陀等成就多功德如經具足無量功
德故證淨者有四種一者得淨現智善決定故如
經離癡疑悔故二者不行淨修道中一切煩惱不
行故如經無有染污故三者無厭足淨不樂小乘
得上勝希望心如經善任深心信故深心者希欲
故信者決定故復念持彼功德故四者不隨他教

淨趣盡道中自正行故如經於佛法中不隨他教
故

經曰爾時金剛藏菩薩言佛子雖此菩薩衆善清淨
深心善清淨諸念善集諸行多親近諸佛善集助道
法具足無量功德離癡疑悔無有染污善任深心信
於佛法中不隨他教其餘樂小法者聞是甚深難思
議事多生疑惑是人長夜受諸無利哀惱我愍此等
是故默然

論曰是聖者金剛藏領彼解脫月菩薩所嘆衆清
淨功德已於所說法中不見法器聞增疑惑是故

不說於一法中有二種過疑者正行相違猶豫義
故惑者心迷義故能壞善法遠離善法故如是顯
示不受行因受行退因

經曰爾時解脫月菩薩請金剛藏菩薩言善哉佛子
重請此事願承佛神力善分別此不可思議法佛所
護念事令人易信解所以者何善說十地義十方諸
佛法應護念一切菩薩護是智地勤行方便何以故
此是菩薩最初所行成就一切諸佛法故佛子譬如
一切書字數說皆初章所攝初章爲本無有書字數
說不入初章者如是佛子十地者是一切佛法之根

本菩薩具足行是十地能得一切智慧是故佛子願
說此義諸佛護念加以神力令人信受不可破壞
論曰聖者解脫月何故復重請示復疑惑此不可
避若不說者有多過咎不得成就一切佛法故以
是義故重請金剛藏菩薩若諸佛有力能令生信
何故衆生於彼法中猶起謗意有二種定一感報
定二作業定此二種定諸佛威力所不能轉最初
所行者依阿舍行故成就一切佛法者謂是證智
書者是字相如嘶字師子形相等字者惡阿等音
數者名句此二是數義說者是語一切書字數說

等皆初章爲本

經曰爾時諸菩薩衆一時同聲以偈頌請金剛藏菩
薩言

大上妙無垢智 堪無量義辯 演說美妙言
真實義相應 念堅清淨慧 爲十力淨心
無礙分別義 說此十地法 定戒深正意
離我慢妄見 此衆無疑心 惟願聞善說
如渴思冷水 如飢思美食 如病思良藥
如衆蜂依蜜 我等亦如是 願聞甘露法
善哉清淨智 說勝地無垢 具十力無礙

論
地論卷一
經一

盡說善逝道

論曰初偈嘆證力辯才成就第二偈上句嘆阿舍力辯才成就以證力阿舍力故能有所說是故讚嘆上者是總又復上者顯證力辯才勝故嘆辯才有三種一真實智二體性三者果真實智者是無漏智勝聲聞緣覺智等偈言妙無垢智故體性者成就無量義辯才偈言堪無量義辯故果者字義成就復是滑利勝上字義成就偈言演說美妙言真實義相應故第二偈上句嘆阿舍力偈言念堅清淨慧 爲十力淨心 無礙分別義

說此十地法

念堅者受持顯說故是菩薩於阿舍中淨慧無疑故如是嘆證力阿舍力已次令聽者入證入阿舍是故請說云何入證已入地者令得佛力故未入地者令得入地故偈言爲十力故爲淨心故云何爲阿舍無礙分別義令受持十地法故如是嘆說者成就證力阿舍力已次復嘆衆堪受阿舍及證力故偈言 離我慢妄見 是衆無疑心 定戒深正意 惟願聞善說

此偈中惟願者是總惟願有二種一求阿舍二求
正證有二種妄想不堪聞阿舍一我二慢以我慢
故於法法師不生恭敬復有二種妄想不堪得證
一見二疑見者顛倒見故疑者於不思議處不生
信故妄者謂妄想見中同使故有二種對治堪聞
阿舍一定二戒定者心調伏故戒者善任威儀故
次有二種對治堪能得證一正見二正意正見者
善思義故正意者得歡喜故深者細意善思惟故
復以諸喻顯示大衆求法轉深偈言

如渴思冷水 如飢思美食 如病思良藥

如衆蜂依蜜 我等亦如是 願聞甘露法

此四喻者喻四種義門示現正受彼所說義何等
爲四一受持二助力三遠離四安樂行此義云何
如水不嚼隨得而飲如是聞慧初聞卽受隨聞受
持如食咀嚼身力助成如是思慧嚼所聞法智力
助成如服良藥藥行除病如是具聞思慧隨順正
義如法修行遠離一切煩惱習患如蜜衆蜂所依
藥行在處如是聞思修慧果聖所依處現法愛味
受樂行故如是讚嘆說者聽者請說已次嘆所說
法利益咸皆共請偈言

具十六無礙

善哉清淨智 說勝地無垢 具十力無礙

盡說善逝道

善哉者所說法中善具足故善哉有三種一所依二體性三果所依者謂淨慧體性者謂說諸地未曾說法勝地者地校量勝無垢者說不違義違義說者有三種垢一者倒說二謗如來三誑聞者果者謂具十力無障礙佛菩提故如是請已猶故不說何故不說請不滿故

十地經論卷第一

較論

序第一紙十一行南藏作十三行此云南藏作魏云南藏作第二紙七行研依南藏改研一卷第一紙二行南藏作第三紙三行如是來

音釋

躋助革切 壺音尾猶 玄枵枵許嬌切 押北買

深也

不絕也 屬子位也

切

北買

佛法于加

十地經論第一卷計字一萬零叁百七十八

弘法會松江信士徐爾鉉施寫銀五錢一分八厘祈

先施宋氏凡身頓淨法性恒明道邦不退永證菩提

信士徐洙承施刻併板紙銀四兩六錢二分祈

先施宋氏凡身頓淨法性恒明道邦不退永證菩提

信士徐洙承閱抱香庵袒瘠對陳昭寫

崇禎癸未孟夏松江弘法會貴州赤水釋繼慶較識

十地經論卷第二

天 親 菩 薩 造

○初歡喜地第一之二

論曰此菩薩前同生衆上首請次大眾請復侍諸

佛法王加請何以故爲增敬重法故

經曰爾時釋迦牟尼佛從眉間白毫放菩薩力明光
燄阿僧祇阿僧祇光以爲眷屬放斯光已普照十方
諸佛世界靡不周徧照已還任本處三惡道苦皆得
休息一切魔宮隱蔽不現悉照十方諸佛衆會顯現

如來境界不思議力是光徧照十方世界加一切如來所加說法者及諸菩薩衆於上虛空中成大光明雲網臺而任彼十方諸佛亦復如是從眉間白毫俱放菩薩力明光燄阿僧祇阿僧祇光網以爲眷屬放斯光已普照十方諸佛世界靡不周徧照已還任本處三惡道苦皆得休息一切魔宮隱蔽不現悉照十方諸佛衆會顯現如來境界不思議力是光徧照十方世界加一切如來所加說法者及諸菩薩衆顯現如來境界不思議力并照釋迦牟尼佛大會之衆及金剛藏菩薩身於上虛空中亦復成大光明雲網臺

而任爾時釋迦牟尼佛從眉間放白毫光明照彼十方世界諸佛大會諸菩薩身及師子座此諸大衆皆悉現見彼十方世界諸佛從眉間放白毫光明照此三千大千娑婆世界釋迦牟尼佛大會并金剛藏菩薩身及師子座彼諸大衆皆悉現見時大光明雲網臺中諸佛神力故而說頌曰

論曰何故如來現神通力放光同請是如來前已意加未身口加異於餘佛是故今欲具身口加何故不以嘗口嘗身加爲重法故不輕自身故此光有八種業二種身云何八種業一者覺業是光照

諸菩薩身已自覺如來力加如經放菩薩力明光
燄故二者因業阿僧祇光皆有無量光明眷屬如
經阿僧祇阿僧祇光以爲眷屬故三者卷舒業舒
則徧至阿僧祇世界卷則還入嘗光如經放斯光
已普炤十方諸佛世界靡不周徧炤已還在本處
故四者止業除滅一切惡道種種苦惱如經三惡
道苦皆得休息故五者降伏業令一切魔王威光
不現驚怖恐懼不能壞亂可化衆生如經一切魔
宮隱蔽不現故六者敬業現不思議佛神力故如
經悉炤十方諸佛衆會顯現如來境界不思議力

故七者示現業加十方世界諸佛所加菩薩大會
令此衆見如經是光徧炤十方世界加一切如來
所加說法者及諸菩薩衆故八者請業發聲說偈
如經時大光明雲網臺中諸佛神力而說頌曰故
云何二身一如流星身往他方世界故二如日身
處於虛空如經於上虛空中成大光明雲網臺而
住故於一切處一時徧炤故如是彼此諸衆生迭
互相見猶如一會聽說亦爾是名身加何者口加
偈曰

諸佛無等等 功德如虛空 十方無畏等

無量諸衆首 釋迦姓法生 天人上作加
承諸佛神力 爲開法王藏 諸地上妙行
分別智地義 是諸如來加 護於諸菩薩
此人能聞持 如是微妙法 諸地淨無垢
漸次而滿足 證佛十種力 成無上菩提
雖在於大海 及劫盡火中 決定信無疑
必得聞此經 諸地勝智道 入地住展轉
漸次而演說 無量行境界

論曰是初二偈顯能加者及加所爲此二加示現
何義故加若請非尊者法非殊勝聖者則不說云

何初偈顯能加者偈言天人上作加故何者天人
上謂諸佛如來此有何義法王義故云何知彼是
法王成就四種勝故一自在勝二力勝三眷屬勝
四種姓勝何者諸佛自在勝於煩惱障智障得解
脫自在彼於此處心智無礙隨意所受無上樂故
此云何知偈言諸佛無等等故謂一切智故復如
虛空世間法不能染無明煩惱習氣滅故無等者
諸佛比餘衆生彼非等故等者此彼法身等故何
故不但說無等示現等正覺故何者諸佛力勝具
足十力故能伏一切邪智壞魔怨故此云何知偈

言十力無畏等故何者諸佛眷屬勝具攝菩薩聲
聞諸衆故此云何知偈言無量諸衆首故彼菩薩
是初衆故無量者阿僧祇故諸衆首者佛於世間
最勝上故何者佛種姓勝謂家姓勝故此云何知
偈言釋迦姓法生故何故唯嘆此佛種姓以現見
故復以法爲家非但生家法家者如法中住故作
加者是總相加有二種一具身加依法身故二具
果加證佛果故天人上者亦總亦別餘者唯別云
何第二偈顯加所爲此菩薩彼諸佛法王爲開現
法藏義故加偈言

承諸佛神力 爲開法王藏 諸地上妙行

分別智地義

嘆此法藏有二種一義藏成就二字藏成就云何
義藏偈言諸地上妙行行者諸菩薩行所謂助道
法故妙者真實智故上者神力勝故如是顯示深
妙勝上故云何字藏偈言分別智地義分別者說
于地差別故此偈中何故顯承佛神力說或有衆
生於如來所生輕慢想已自不能請他而說爲遮
此故如是請說法已次顯說法利他有三時益於
中有三偈三時益者一聞時益二修行時益三轉

生時益何者聞時益偈言

是諸如來加護於諸菩薩此人能聞持
如是微妙法

菩薩聞持者佛力加故是名聞時益何者修行時
益偈言

諸地淨無垢漸次而滿足證佛十種力

成無上菩提

漸次滿十地自身得十力成無上菩提故是名修
行時益何者轉生時益偈言

雖在於大海及劫盡火中決定信無疑

必得聞此經

惡道善道難處生必得聞此法龍世界長壽亦得
聞此經偈言雖在於大海故雖在色界光音天等
亦得聞此經偈言及劫盡火中故聞此法者爲皆
得利益有不得者不也何者能得決定不疑信此
法者是人能得偈言決定信無疑必得聞此經故
如是顯示請說利益已上言分別智地義者此所
說法有三種漸次第六偈教分別此事偈言

諸地勝智道入地住展轉漸次而演說

無量行境界

何者三漸次一觀漸次二證漸次三修行漸次第
一第二第四句皆說漸次勝智道者謂十地勝智
道說此十地若觀若漸止能生諸地智故入者入
地故住者未轉向餘地故展轉者地地轉所住處
故行者謂入住展轉成就故境界者此行種種異
行境界故漸者次第故說者授與故如是教說何
義故顯一切因如來能有所說生後正信義故
經曰爾時金剛藏菩薩摩訶薩觀察十方欲令大衆
重增踊悅生正信故以偈頌曰
微難知聖道 非分別離念 難得無垢濁

智者智行處	自性常寂滅	不滅亦不生
自體本來空	有不二不盡	遠離於諸趣
等同涅槃相	非初非中後	非言辭所說
出過於三世	其相如虛空	定滅佛所行
言說不能及	地行亦如是	難說復難聞
離念及心道	智起佛境界	非陰界入說
心意所不及	如空中鳥跡	難說不可見
十地義如是	不可得說聞	我但說一分
慈悲及願力	漸次非心境	智滿如淨心
是境界難見	難說自心知	我承佛力說

咸共恭敬聽 如是智入行 億劫說不盡
今如是略說 如實滿足任 一心恭敬待
承佛力善說 說上法妙音 喻相應善字
是言說甚難 無量佛神力 光燄入我身
是力我能說

論曰何故觀察十方示無我慢無偏心故欲令大
衆重增踊悅深生正信是故說偈示說正他增益
聞者堪受義故踊悅者心清不濁故踊悅有二種
一義大踊悅爲得義故二說大踊悅因此說大能
得彼義故是中前五偈顯義大踊悅云何義大彼

義深故何者深義偈言

微難知聖道 非分別離念

此偈依何義說依智地故云何知依智地上來所
說皆依智地後復所說亦依智地第四偈言智起
佛境界故微者云何微偈言難知聖道故云何難
知謂說時難知復云何難知大聖道難知大聖者
所謂諸佛是故言微道者是因修行此道能到聖
處故言難知聖道此微有二種一說時甚微二證
時甚微如是次第何故復難知偈言非分別離念
故非分別者離分別境界故離念者自體無念故

如是聖道名爲甚微何故甚難得難得者難證故是名甚微何故復甚難得偈言
難得無垢濁 智者智行處 自往常寂滅
不滅亦不生
無垢濁者智中無無明故有無明雜智是名爲濁智者智行處者自證智故自證知者依彼生故於中智者見實諦義故復增上善解法故增上善寂滅故復有世間智隨聞明了知故自往常寂滅者自性離煩惱故非先有染後時離故不滅者非一往滅爲不捨利益衆生故不生者出世間故如是

此智不住涅槃世間中故如是觀行甚微依止甚微清淨甚微功德甚微故言甚難得於中第一甚微不同世間三昧故第二第三不同外道自言尊者故第四不同聲聞辟支佛故於此偈中微者是總二種微是別復顯難得時甚微是總餘四種甚微是別此甚微智復有何相偈言
自體本來空 有不二不盡 遠離於諸趣
等同涅槃相 非初非中後 非言辭所說
出過於三世 其相如虛空
是智相有二種所謂同相不同相是中同相者云

何相彼智相故偈言自體本來空智自空故云何
同相一切諸法如說自體空自體空者可如是取
如兔角邪不也可如是取異此空智更有異空耶
不也可如是取有彼此自體彼此轉滅耶不也云
何取此自體空有不二不盡如是取此句顯離三
種空攝一離謗攝二離異攝三離盡滅攝有二種
頌一有不二不盡二定不二不盡此頌雖異同明
實有若非實有不得言定此云何定此定能滅諸
煩惱故是名同相何者不同相謂淨相解脫此復
有二種一何處得解脫二云何解脫何處得解脫

者偈言遠離於諸趣此顯諸道解脫遠離煩惱業
生故云何解脫者偈言等同涅槃相世間涅槃平
等攝取故非如聲聞一向背世間故此智盡漏爲
初智斷爲中爲後非初智斷亦非中後偈言非初
非中後故云何斷如燈燄非唯初中後前中後取
故如是解脫可同他音聲觀耶不也云何觀偈言
非言辭所說離語言故可同世間智依世間耶不
也云何依偈言出過於三世轉依止依止嘗身故
非如無嘗意識智依止無常因緣法如修多羅中
決定說此解脫可同聲聞緣覺智有障解脫得解

脫耶不也云何解脫偈言其相如虛空無一切煩惱障礙故如是觀智如是所煩惱如是觀觀如是依止依止如是解脫得解脫如是說已於中自體空是總三種空是別解脫是總五種解脫是別偈言

定滅佛所行 言說不能及 地行亦如是

難說復難聞

此偈云何彼智以顯方便壞涅槃復示性淨涅槃偈言定滅故定者成同相涅槃自性寂滅故滅者成不同相方便壞涅槃示現智緣滅故此智是誰

證偈言佛所行故誰說誰聽無說無聽偈言言說不能及故言說者口音言導謂名句字身何故不但說無言示現依言求解故依智既如是地行復何相偈言地行亦如是難說復難聞地者境界觀行者智眷屬智眷屬者謂同行同行者謂檀等諸波羅蜜何故復難說難聞偈言

離念及心道 智起佛境界 非陰界入說

心意所不及

此偈示現思慧及報生識智是則可說此智非彼境界以不同故偈言智起佛境界故如陰界入可

說此智不爾離文字故是故不可說偈言非陰界
入說故非耳識所知非意識思量是故不可聞偈
言心意所不及故智者是地智起者以何觀以何
同行能起此智云何可證而不可說而不可聞今
復以喻證成此義偈言

如空中鳥跡 難說不可見 十地義如是
不可得說聞

此偈示何義如鳥行空中跡處不可說相亦不可
見何以故虛空處鳥跡相不可分別故非無虛空
行跡如是鳥跡任處名句字身任處菩薩地證智

所攝不可得說不可得聞何以故非如聲性故非
無地智名句字身此中深故示義大踊悅何故我
復說此汝等不應如聲取義隨聲取義有五種過
一不正信二退勇猛三誑他四謗佛五輕法大衆
自知無此五過已說深義復顯說大令生正信次
說五偈

我但說一分 慈悲及願力 漸次非心境
智滿如淨心 是境界難見 難說自心知
我承佛力說 咸共恭敬聽 如是智入行
億劫說不盡 今如是略說 如實滿足任

一心恭敬待 承佛力善說 說上法妙音
喻想應善字 是言說甚難 無量佛神力
光燄入我身 是力我能說

前言十地義如是不可得說聞今言我但說一分
此言有何義是地所攝有二種一因分二果分說
者謂解釋一分者是因分於果分爲一分故言我
但說一分此說大有三種一因成就大二因漸成
就大三教說修成就大何者因成就大偈言慈悲
及願力故慈者同與喜樂因果故悲者同拔憂苦
因果故願者發心期大菩提故此慈悲願長夜熏

修不同二乘故何者因漸成就大偈言漸次故漸
者說聞思慧等次第乃至能生出世間智因故何
者教說修成就大有二種一滿足修二觀修滿足
修者偈言非心境故非心境者此句示現聞思慧
等心境界處唯是智因能生出世間智而此不能
滿彼出世間智地偈言智滿如淨心故如淨心者
如出世間清淨心能滿彼地智故觀修者偈言
是境界難見 難說自心知 我承佛力說
咸共恭敬聽

此偈顯何義是境界難見自心清淨可見此境界

不可說如是教說修成就已於說法中有二種過
不能得證一說者過二聽者過說者過有二種一
佛不隨喜說二不平等說聽者亦有二種過一見
諍過我法是他法非如是執著種種諸見二於說
法者不生恭敬於中示現諸者自身無過我非諸
佛不隨喜說偈言我承佛力說咸聽故次教聽者
防二種過偈言共恭敬聽故如是次第如是許說
而衆未知廣說略說不可廣說唯許略說地義滿
足如第三偈說

如是智入行 億劫說不盡 今如是略說

如實滿足住

智入者此所說地法衆生以智入云何入如實滿
足攝取入如行修故如行修滿足故示彼廣說義
攝取故任者如來家決定任故我如是說前言恭
敬聽不說云何恭敬是故示現偈言

一心恭敬待 承佛力善說 說上法妙音

喻相應善字

一心恭敬待者有二種一身正恭敬待如威儀住
堪受說法故二心正恭敬待如心決定堪能憶持
故此句勸誡二種恭敬待所謂身心故善說者示

已無諂無有僣慢故承佛力者示已無增上慢故
下半偈說上法妙音喻相應善字示現何事以何
事云何事依止何事示現何事者所謂上法以何
事者謂妙音聲云何事者譬喻相應依止何事者
謂依止善字我一切善說又相應者譬喻共相應
善字者有二種相一隨方言音善隨順故二字句
圓滿不增不減與理相應故言善字前言承佛神
力未說云何力第五偈示現佛神力事偈言
是言說甚難 無量佛神力 光燄入我身
是力我能說

已說請分自此以後正說初地此說分中說何等
事分別有三一住二釋名三安住住中有四種依
何身爲何義以何因有何相彼心生時卽住初地
是名爲住於中諸佛子善集善根故如是等四十
句說此住事初說依何身生如是心

經曰諸佛子若有衆生厚集善根故善集諸善行故
善集諸三昧行故善供養諸佛故善集清白法故善
知識善護故善清淨心故入深廣心故信樂大法好
求佛智慧故現大慈悲故如是衆生乃能發阿耨多
羅三藐三菩提心

論曰如是十句說依何身此集有九種一者行集善作眷屬持戒如經善集諸善行故二者定集善作眷屬三昧如經善集諸三昧行故三昧行者觀行增上故三者親近習善習聞慧智如經善供養諸佛故四者聚集思慧智善思量波羅蜜等諸善法如經善集清白法故五者護集修行實證善得教授如經善知識善護故六者淨心集得出世間正智如經善清淨心故七者廣集深心作利益一切衆生如經入深廣心故八者信心集求一切智智如經信樂大法好求佛智慧故九者現集多行

慈悲如經現大慈悲故於中慈念依苦苦壞苦悲依行苦是中初二種集顯增上戒學增上定學行集善作眷屬持戒故定集善作眷屬三昧故次有四集顯增上慧學親近集善習聞慧智故聚集思慧智善思量波羅蜜等諸善法故護集修行實證善得教授故淨心集得出世間正智故後三集顯勝聲聞辟支佛等故廣集深心作利益一切衆生故信心集求一切智智故現集多行慈悲故此十句中厚集善根是總餘九種是別集者是同相別者是異相成者略說故壞者廣說故已說依何身

生如是心次說爲何義故生如是心
經曰爲得佛智故爲得十力力故爲得大無畏故爲
得佛平等法故爲救一切世間故爲淨大慈悲故爲
得十方無餘智故爲得一切世間無障淨智故爲得
一念中覺三世事故爲得轉大法輪無所畏故菩薩
摩訶薩生如是心

論曰於中佛智者謂無上智知斷證修故此佛智
有九種業差別爲求彼故生如是心一者力佛智
問記業此如來是處非處智力問記故如修多羅
中說如經爲得十力力故二者無畏佛智破邪說

業如經爲得大無畏故三者平等佛智得人法無
我教授衆生證人業如經爲得佛平等法故四者
救佛智以四攝法化衆生業如經爲救一切世間
故五者淨佛智是淨爲救攝因業如經爲淨大慈
悲故六者無餘智佛智常以佛眼觀世間衆生業
如經爲得十方無餘智故七者無染佛智一切世
界無障無染自然應化令信作業智心無礙如經
爲得一切世界無障淨智故八者覺佛智於一念
中知三世衆生心心數法業如經爲得一念中覺
三世衆事故九者轉法輪佛智解脫方便善巧業

故於百億閻浮提同時轉大法輪如經爲得轉大法輪無所畏故生如是心者卽是本分中說諸佛子是菩薩願善決定故何故唯言生心不言生智及餘心數法心中卽攝知斷證修一切助道法故已說爲何義故生如是心次說以何因生如是心經曰是心以大悲爲首智慧增上方便善巧所攝直心深心淳至如來力無量善決定衆生力智力隨順自然智能受一切佛法以智慧教化廣大如法界究竟如虛空盡未來際

論曰此大悲爲首於中悲大有九種一者增上大

細苦智增上生故如經智慧增上故智者因果逆順染淨觀故慧者自相同相差別觀故二者攝大救苦衆生方便善巧所攝如經方便善巧所攝故三者淳至大向時許乃至盡衆生界作利益衆生悲心增上如經直心深心淳至故四者無量大攝取如來無量力如經如來力無量故五者決定大上妙決定信深智勝對治如經善決定衆生力智力故六者隨順大隨順菩提正覺如經隨順自然智故七者正受大能取大勝法教授衆生如經能受一切佛法以智慧教化故八者最妙大攝受勝

妙功德如經廣大如法界故九者任盡大無量愛
果因盡涅槃際如經究竟如虛空盡未來際故已
說以何因生如是心次說是心生時有何等相
經曰菩薩生如是心卽時過凡夫地入菩薩位生在
佛家種姓尊貴無可譏嫌過一切世間道入出世間
道任菩薩法中任在菩薩正處入三世真如法中如
來種中畢定究竟阿耨多羅三藐三菩提菩薩任如
是法名住菩薩歡喜地以不動法故

論曰過凡夫地者以過凡夫地故示現得出世間
聖道此過有八種一者入位過初成出世間心如

始任胎相似法故如經入菩薩位故二者家過家
生相似法故如經生在佛家故三者種姓過子相
似法大乘行生故如經種姓尊貴無可譏嫌故四
者道過世間出世間道不攝攝故異道生相似法
故如經過一切世間道入出世間道故五者法體
過以大悲爲體於作他事卽是已事自身體相似
法故如經住菩薩法中故六者處過不捨世間方
便不染善巧任故任處相似法故如經任在菩薩
正處故七者業過順空聖智生命相似法故如經
入三世真如法中故八者畢定過佛種不斷究竟

涅槃道成就相似法故如經如來種中畢定究竟
阿耨多羅三藐三菩提故如是示現凡夫生菩薩
生入胎不相似有煩惱無煩惱故如是次第家不
相似種姓不相似道不相似體不相似處不相似
生業不相似成就不相似如是說住此地中是名
爲住如經菩薩住如是法名住菩薩歡喜地以不
動法故已說住義次說釋名云何說多歡喜故示
名歡喜以何歡喜此地中菩薩歡喜復以何念初
說十句後說二十句

經曰諸佛子是菩薩住菩薩歡喜地中成就多歡喜
多信敬多愛念多慶悅多調柔多踊躍多堪受多不
壞他意多不惱衆生多不瞋恨

論曰歡喜者名爲心喜體喜根喜是歡喜有九種
一者敬歡喜於三寶中恭敬故如經多信敬故二
者愛歡喜樂觀真如法如經多愛念故三者慶歡
喜自覺所證較量勝如經多慶悅故四者調柔歡
喜自身心遍益成就如經多調柔故五者踊躍歡
喜自身心遍益增上滿足如經多踊躍故六者堪
受歡喜自見至菩提近如經多堪受故七者不壞
歡喜自心調伏論義解脫時心不擾動如經多不

壞他意故八者不惱歡喜教化攝取衆生時慈悲
調柔如經多不惱衆生故九者不瞋歡喜見諸衆
生不如說修行威儀不正時忍不瞋故如經多不
瞋恨故已說多歡喜次說以何念故歡喜成是第
二十第三十句說是念有二種一念當得二念現
得何者念當得

經曰諸佛子菩薩任是歡喜地中念諸佛故生歡喜
心念諸佛法故生歡喜心念諸菩薩摩訶薩故生歡
喜心念諸菩薩所行故生歡喜心念諸波羅蜜清淨
相故生歡喜心念諸菩薩地較量勝故生歡喜心念
諸菩薩力不退故生歡喜心念諸如來教化法故生
歡喜心念能利益衆生故生歡喜心念入一切如來
智行故生歡喜心

論曰云何念如佛所得我亦當得如是念此念佛
有九種一者念佛法如經念諸佛法故生歡喜心
二者念佛菩薩如經念諸菩薩摩訶薩故生歡喜
心三者念佛行如經念諸菩薩所行故生歡喜心
四者念佛淨如經念諸波羅蜜清淨相故生歡喜
心五者念佛勝如經念諸菩薩地較量勝故生歡
喜心六者念佛不退如經念諸菩薩力不退故生

歡喜心七者念佛教化如經念諸如來教化法故
生歡喜心八者念佛利益如經念能利益衆生故
生歡喜心九者念佛入如經念入一切如來智行
故生歡喜心於中初二念共念佛如佛所得我亦
當得故念佛念諸佛法故念佛佛法二故念佛菩
薩二念諸菩薩故念佛行念諸菩薩行故如是次
第餘有六句念佛淨念諸波羅蜜清淨相故念佛
勝念諸菩薩地較量勝故念佛不退念諸菩薩力
不退故念佛教化念諸如來教化法故念佛利益
念能利益衆生故念佛入念入一切如來智行故

隨所顯彼菩薩行以何顯如是諸念應知復何顯
彼波羅蜜淨顯云何顯彼菩薩行地較量勝轉去
故地盡去故於中餘者得教化法故作利益衆生
行不虛故人如來地行故是中念佛行者亦總亦
別已說念當得故生歡喜心次說念現得故生歡
喜心

經曰諸佛子菩薩復作是念我轉離一切世間境界
故生歡喜心近入如來所故生歡喜心遠離凡夫地
故生歡喜心近到智慧地故生歡喜心斷一切惡道
故生歡喜心與一切衆生作依止故生歡喜心近見

一切諸佛故生歡喜心生諸佛境界故生歡喜心入一切菩薩真如法故生歡喜心我離一切怖畏毛豎等事故生歡喜心

論曰我轉離一切世間境界者轉離一切凡夫取著事此轉離有九種一者入轉離如經近入如來所故生歡喜心二者遠轉離如經遠離凡夫地故生歡喜心三者近至轉離如經近到智慧地故生歡喜心四者斷轉離如經斷一切惡道故生歡喜心五者依止轉離如經與一切衆生作依止故生歡喜心六者近見轉離如經近見一切諸佛故生

歡喜心七者生轉離如經生諸佛境界故生歡喜心八者平等轉離如經入一切菩薩真如法故生歡喜心九者捨轉離如經我離一切怖畏毛豎等事故生歡喜心於中入轉離者顯事不相似故遠轉離近至轉離者示自身不相似故餘有六句斷轉離依止轉離近見轉離生轉離平等轉離捨轉離如是次第行不相似故迭相依止不相似故他力不相似故處不相似故生業不相似故成就不相似故怖畏者不愛疑慮憂想共心相應故復身相差別謂毛豎等事次說何者是怖畏云何怖畏

因遠離此因無怖畏故

經曰所以者何是菩薩摩訶薩得歡喜地已所有諸怖畏卽皆遠離所謂不活畏惡名畏死畏墮惡道畏大衆威德畏離如是等一切諸畏何以故是菩薩離我相故尚不貪身何況所用之事是故無有不活畏心不怖望供養恭敬我應供養一切衆生供給一切所須之具是故無有惡名畏遠離我見無我相故無有死畏又作是念我若死已生必不離諸佛菩薩是故無有墮惡道畏我所志樂一切世間身心無與等者何況有勝是故無有大衆威德畏諸佛子菩薩如

是離諸怖畏毛豎等事

論曰此五怖畏是初地障復說地利益勝是五怖畏第一第二第五依身口意第三第四依身依身者愛憎善道惡道捨得依身故何故但說五怖畏打縛等諸畏皆五所攝故此怖畏因略有二種一邪智妄取想見愛著故二善根微少故此對治如經離我想故尚不貪身乃至無有大衆威德畏故無怖畏毛豎等事何故二處說前說身怖畏後說異身怖畏故

經曰諸佛子是菩薩以大悲爲首深大心堅固轉復

勤修一切善根成就故

大悲論首卷大心迴轉

論曰深大心堅固者煩惱小乘不能壞此觀故轉復勤修一切善根成就者諸所說善根此地攝受故云何勤修於中有三種成就一信心成就二修行成就三迴向成就有三十句示現初十句說信心成就

經曰所謂信心增上故多恭敬故信清淨故多以信分別故起悲愍心故成就大慈故心無疲倦故以慚愧莊嚴故成就忍辱安樂故敬順諸佛教法信重尊貴故

論曰信心增上者隨所有事於中信增上成就此信增上有九種一者敬信增上尊敬三寶如經多恭敬故二者淨信增上自證真淨智如經信清淨故三者分別信增上令他證淨智如經多以信分別故四者悲信增上五者慈信增上教化衆生如經起悲愍心故成就大慈故悲者除苦想決定救濟故慈者與樂相承與無量樂故起者轉復現前故六者不疲倦信增上教化無量衆生久處世間能利益故如經心無疲倦故七者慚愧信增上不著世間故於慳等波羅蜜障法深慚愧故如經以

慙愧莊嚴故八者安樂信增上於回法者不惱亂
故如經成就忍辱安樂故九者敬法信增上敬信
殊勝心故如經敬順諸佛教法信重尊貴故後三
句示修何等行波羅蜜行故誰爲等侶同事安樂
故入何法中謂諸佛教法如是信心成就云何修
行成就

經曰日夜修集善根無厭足故親近善知識故常愛
樂法故求多聞無厭故如所聞法正觀故心不貪著
故不著利養名聞恭敬故不求一切資生之物故常
生如實心無厭足故

論曰此十句說修行成就云何修行成就集諸善
根無休息故如經日夜修集善根無厭足故此集
有八種一者親近集不忘諸法如經親近善知識
故二者樂法集於問答中論義解釋心喜樂故如
經常愛樂法故三者多聞集如經求多聞無厭故
四者正觀集如經如所聞法正觀故五者不著集
如經心不貪著故向說多聞集等三句是聞思修
慧如是次第不著者於三昧中無愛著故六者不
貪集七者不求集於已得利養不貪未得利養不
求障菩薩戒退菩薩戒如經不著利養名聞恭敬

故不求一切資生之物故入者如實心集出世間
心念念現前如經常生如實心無厭足故如是修
行成就云何迴向成就

經曰求一切智地故求諸佛力無畏不共法故求諸
波羅蜜無著法故離諸諂曲故如說能行故常護實
語故不汙諸佛家故不捨菩薩戒故不動如大山王
生薩婆若心故不捨一切世間事成就出世間道故
集助菩提分法無厭足故常求上上勝道故諸佛子
菩薩摩訶薩成就如是淨治地法名爲安住菩薩歡
喜地

論曰求一切智地等說何等事示現迴向成就故
求一切智地是總求如來力等於一切智地是別
一者觀求一切智地二者無障求一切智地三者
離求一切智地故四者如說能行求一切智地五
者護求一切智地六者不汙求一切智地七者不
捨求一切智地八者不動求一切智地九者不捨
成就求一切智地十者集求一切智地十一者常
求求一切智地於中求何等事求一切智地故以
何觀求觀諸佛力無畏不共法故云何求求諸波
羅蜜無著法故此三求者是家依家無障求著別

異求於中檀波羅蜜有二種垢一者諂曲見乞求者詐設方便無心許與二者不隨先言許而不與對治是垢如經離諸諂曲故如說能行故尸波羅蜜有一種垢不護實語違本所受犯已覆藏對治是垢如經常護實語故羸提波羅蜜有一種垢汗如來家云何菩薩汗如來家惱亂他業故利益他業卽是如來家是故菩薩生此家者惱亂他業非善事故對治是垢如經不汗諸佛家故毗黎耶波羅蜜有一種垢菩薩戒無量劫數長遠難持難行生退轉心對治是垢如經不捨菩薩戒故禪波羅

蜜有二種垢一者亂心二不能調伏憶想分別對治是垢如經不動如大山王生薩婆若心故般若波羅蜜有三種垢一無善巧方便世間涅槃一向不現現故二不修集出世間道故三於勝上證法中願欲心薄故如是次第對治是垢如經不捨一切世間事成就出世間道故集助菩提分法無厭足故常求上上勝道故如是迴向成就是名勤行具足成就是勤行有四種一信二欲三精進四方便初十句示現信增上成就是信增上卽攝受欲第二十句日夜修集善根無厭示現精進故第三

7 8 9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5

十地經論卷第二

十句求一切智地示現方便故是名此地說中安住何以故如經諸佛子菩薩摩訶薩成就如是淨治地法名爲安住菩薩歡喜地故如是說分訖

十地經論卷第二

較論

第八紙

十三行往字依後文當作性字

十地經論第二卷計字一萬零七十三

弘法會松江信士徐爾鉉施寫銀五錢零四厘所先室宋氏淨根塵而入法界遊樂土以悟無生信士徐海承施刻併板紙銀四兩五錢二分祈先妣宋氏凡身頓淨法性恒明蓮那不退永證菩提

宣上徐位承恩 抱香庵祖瞻對 貴州釋經度夜識

十地經論卷第三

天 親 菩 薩 造

元魏三藏法師菩提留支奉詔譯

○初歡喜地第一之三

論曰已顯說分次說校量勝分云何較量勝菩薩住此地中勝聲聞辟支佛故較量勝有三種一願勝二修行勝三果利益勝何者願勝所謂十大願經曰菩薩如是安住菩薩歡喜地發諸大願起如是大方便如是大行成就所謂無餘一切諸佛一切供養一切恭敬故一切種具足上深信清淨廣大如法

論 十地經論卷第三 三

界究竟如虛空盡未來際盡一切劫數一切佛成道
數大供養恭敬無有休息

論曰是初大願無餘者有三種一者一切佛無餘
二者一切供養無餘三者一切恭敬無餘一切佛
者有三種佛一應身佛二報身佛三法身佛一切
供養者有三種供養一者利養供養謂衣服卧具
等二者恭敬供養謂香華旛蓋等三者行供養謂
修行信戒行等一切恭敬者有三種恭敬一給侍
恭敬二迎送恭敬三修行恭敬是故作願供養恭
敬如經所謂無餘一切諸佛一切供養一切恭敬

故一切種具足者無量種種復勝事等供養故土
深信清淨者增上敬重故願迴向菩提決定信故
廣大如法界者一切餘善根中勝故究竟如虛空
者無嘗愛果無量因故盡未來際者此因得涅槃
常果故一切劫數一切佛成道數大供養恭敬無
有休息故此初願中有六種大名爲大願一者福
田大如經所謂無餘一切諸佛一切供養一切恭
敬故二者供事大如經一切種具足故三者心大
如經上深信清淨故四者攝功德大如經廣大如
法界故五者因大如經究竟如虛空故六者時大

如經盡未來際故

經曰又發大願所謂一切諸佛所說法輪皆悉受持故攝受一切佛菩提故一切諸佛所教化法皆悉守護故廣大如法界究竟如虛空盡未來際盡一切劫數一切佛成道數攝護正法無有休息

論曰第二大願有三種法一切諸佛所說法輪皆悉受持者謂教法修多羅等書寫供養讀誦受持爲他演說故攝受一切佛菩提者所謂證法證三種佛菩提法攝受此證法教化轉授故一切諸佛所教化法皆悉守護者謂修行法於修行時有謬

障難攝護救濟故復名三種成就一者於諸佛所說修多羅等阿舍次第令法輪不斷成就故二者證三種正覺得證成就故三者修行乃至如實修行正覺成就故是名三種成就三種佛菩提者聲聞辟支佛亦名爲佛故

經曰又發大願所謂一切成佛無餘一切世界住處從兜率天來下入胎及在胎中初生時出家時成佛道時請轉法輪時示入大涅槃我於爾時盡往供養攝法爲首一切處一時成一時轉故廣大如法界究竟如虛空盡未來際盡一切劫數一切佛成道數盡

論

十地至論卷三

三

唯三

往攝法無有休息

論曰第三大願一切成佛無餘一切世界住處者一切應佛無邊遍滿一切世界住處故隨何等世界諸佛住處應感相順衆生見故從兜率天來下乃至示入大涅槃我於爾時盡往供養攝法爲首者隨彼衆生供養佛方便以如來所說攝法方便集功德智慧助菩提法故一切處一時成一時轉者非前後故何故示現彼處住不在色無色處此難處來不爲我故起於輕心不生恭敬爲遮此等故何故不住他化自在天等如來有力能勝處生

捨而不生爲念衆生故來生兜率如是生大恭敬心故何故人中捨上天樂愍我等故來生人中生增上敬重心故何故處胎示現同生增長力故何故自成正覺示非餘佛教化現丈夫力成就非因他得菩提故何故示入大涅槃爲令懈怠衆生勤心修道故

經曰又發大願所謂一切菩薩所行廣大無量不雜諸波羅蜜所攝諸地所淨生諸助道法總相別相同相異相成相壞相說一切菩薩所行如實地道及諸波羅蜜方便業教化一切令其受行心得增長故廣

大如法界究竟如虛空盡未來際盡一切劫數行數增長無有休息

論曰第四大願心得增長者以何等行令心增長一切菩薩所行教化一切令其受行心得增長故彼菩薩行有四種一種種二體三業四方便以此四種教化令其受行何者是菩薩行種智世間行有三種廣者從初地乃至六地大者七地無量者從八地乃至十地不雜者法無我平等觀出世間智故如經一切菩薩所行廣大無量不雜故體者如經諸波羅蜜所攝故業者如經諸地所淨生諸

助道法故方便者如經總相別相同相異相成相壞相故說一切菩薩所行如實地道及諸波羅蜜方便業故

經曰又發大願所謂無餘一切衆生界有色無色有想無想非無想非想非非想卵生胎生濕生化生三界所繫雜入六道一切生處名色所攝爲教化成就一切衆生界令信入諸佛法故斷一切世間數道故令任一切智智處故廣大如法界究竟如虛空盡未來際盡一切劫數一切衆生界數教化一切衆生無有休息

論曰第五大願教化眾生故何者是眾生爲何義
故化一切衆生有六種差別一麤細差別二生依
止差別三不淨淨處差別四苦樂差別五自業差
別六自體差別何者麤細差別麤者有色細者無
色色中麤者有想細者無想無色中麤者非無想
細者非想非非想是名麤細差別如經有色無色
有想無想非無想非想非非想故生依止差別者
如經卵生胎生濕生化生故化生者云何依止依
止業生故不淨淨處差別者如經三界所繫故苦
樂差別者種種身故如經雜入六道故自業差別

者如經一切生處故自體差別者如經名色所攝
故是名衆生爲何義化者爲三義故一者爲信入
諸佛所說法中如經爲教化成就一切衆生界令
信入諸佛法故二者已入佛法中令入二乘菩提
故如經斷一切世間數道故三者已入二乘菩提
令入無上菩提故如經令任一切智智處故
經曰又發大願所謂無餘一切世界廣大無量麤細
亂任倒任正任如帝網差別十方世界無量差別入
皆現前知故廣大如法界究竟如虛空盡未來際盡
一切劫數一切世界數信入無有休息

論曰第六大願無餘一切世界者有三種相隨入如是世界智皆現前知一者一切相二者真實義相三者無量相一切相者如經廣大無量乃至正住故廣大無量者一千世界二千世界三千世界故細者隨何等世界意識身故麤者隨何等世界意識身故亂住者非次第住故倒住者不造舍宅住故正住者造舍宅住故是名一切相如帝網差別者真實義相故如業幻作故無量相者十方世界無量差別入故無量相故真實義相者唯智能知餘相者可現見故

經曰又發大願所謂一切佛土一佛土一佛土一切佛土一切國土平等清淨一切佛土神通莊嚴光相具足離一切煩惱成就清淨道有無量智慧衆生悉滿其中入佛上妙平等境界故隨諸衆生心之所樂而爲示現故廣大如法界究竟如虛空盡未來際盡一切劫數佛國土數清淨一切佛土無有休息

論曰第七大願淨佛國土相有七種一者同體淨如經一切佛土一佛土一佛土一切佛土故二者自在淨如經一切國土平等清淨故三者莊嚴淨如經一切佛土神通莊嚴光相具足故光明莊嚴

十地經疏卷三
七
三
衆寶等莊嚴故四者受用淨如經離一切煩惱成
就清淨道故五者住處衆生淨如經有無量智慧
衆生悉滿其中故六者因淨如經入佛上妙平等
境界故七者果淨如經隨諸衆生心之所樂而爲
示現故顯智神力等故

經曰又發大願所謂一切菩薩同心同行故共集善
根無怨嫉故一切菩薩平等一觀故常親近諸佛菩
薩不捨離故隨意能現佛身故自於心中悉能解知
諸佛神力智力故得不退隨意神通故悉能遊行一
切世界故一切佛會皆現身相故一切生處普生其

中故成就不可思議大乘故具足行菩薩行故廣大
如法界究竟如虛空盡未來際盡一切劫數一切行
數入大乘道無有休息

論曰第八大願不念餘乘故如經一切菩薩同心
同行故菩薩行有十種一者共集善根無怨嫉故
二者一切菩薩平等一觀故三者常親近諸佛菩
薩不捨離故四者隨意能現佛身故五者自於心
中悉能解知諸佛神力智力故六者得不退隨意
神通故七者悉能遊行一切世界故八者一切佛
會皆現身相故九者一切生處普生其中故十者

成就不可思議大乘故具足行菩薩行故於中初
句顯功德行故第二住寂靜等觀故第三聚集解
說論佛法故第四隨心示現成佛故第五自發勝
心念如來法身故第六得常不退神通故餘四者
以通業得名一往餘世界二自餘異身示現三同
生往故四入不可思議大乘故

經曰又發大願所謂乘不退輪行菩薩行故身口意
業所作不空衆生見者卽必定佛法故聞我音聲卽
得真實智慧故心喜恭敬卽斷煩惱故得如藥樹王
身故得如如意寶身故行大菩薩行故廣大如法界
究竟如虛空盡未來際盡一切劫數一切行數所作
利益不空無有休息

論曰第九大願顯不空行菩薩行復行菩薩行顯
乘不退輪行菩薩行故於中不空有二種一作業
必定不空身口意業所作不空故如是次第第三句
說應知衆生見者卽必定佛法故者明身業不空
聞我音聲卽得真實智慧者明口業不空心喜恭
敬卽斷煩惱者明意業不空二作利益不空一切
衆生有二種苦一種種諸苦二貧窮苦對治是二
如經得如藥樹王身故得如如意寶身故

經曰又發大願所謂於一切世界處成阿耨多羅三藐三菩提故於一凡夫道不離一切凡夫道處示身初生坐道場成佛道轉法輪度衆生示大涅槃現諸佛境界大神通力隨一切衆生界所應度者於念念中示得佛道度諸衆生滅苦惱故以一三菩提遍知一切法如涅槃性故以一音說令一切衆生心皆歡喜故示大涅槃而不斷菩薩所行故示大智慧地發起一切法故法智通如意神通幻通遍一切世界故廣大如法界究竟如虛空盡未來際盡一切劫數成三菩提數求大智慧大神通等無有休息諸佛子

菩薩如是安住菩薩歡喜地發諸大願起如是大方便如是大行以十願門爲首生如是等滿足十百千萬阿僧祇大願是菩薩任菩薩歡喜地起如是等願

論曰第十大願起大乘行云何大菩提云何作業大菩提者如經成阿耨多羅三藐三菩提故作業者有七種一示正覺業二說實諦業三證教化業四種種說法業五不斷佛種業六法輪復任業七自在業初業者於一凡夫道不離一切凡夫道處乃至示大涅槃故一凡夫道者一闍浮提義闍浮提凡夫道者可化衆生住處名爲凡夫道第二業

者現諸佛境界大神通智力故隨一切衆生界所
應度者於念念中示得佛道度諸衆生滅苦惱故
隨諸世界一切可化者隨心示現佛身示現佛身
者除諸難處彼彼勝處生示除苦斷集證滅修道
第三業者以一三菩提觀法無我一切法性淨涅
槃令衆生信解故第四業者以一音聲隨種種信
解可化衆生一時皆令心歡喜故第五業者示現
大涅槃而不斷菩薩所行力故第六業者復智地
一切修多羅等所說法軌則不失故第七業法智
通者觀一切法無性相故如意神通者自身現生

住滅修短隨心自在故幻通者轉變外事無不隨
意故初法智通不住世間故如意神通幻通幻不
住涅槃故何故唯說此十大願初願功德行滿足
故第二願智慧行滿足故次五願爲教化衆生故
一以何身二以何心三何者衆生四衆生住何處
五自身住何處能教化衆生後三願顯自身一得
地较量勝故二得菩薩地盡较量勝故三得一切
地盡究竟故此三示現如實教化衆生故發諸大
願者隨心求義故起如是大方便者成彼所作方
便勇猛故如是大行者彼所作行成就故菩薩住

此地漸次久習起此三行非一時故何以故此十大願一一願中有百千萬阿僧祇大願以爲眷屬故如經諸佛子菩薩如是安住菩薩歡喜地發諸大願起如是大方便如是大行以十願門爲首生如是等滿足十百千萬阿僧祇大願以爲眷屬故如經諸佛子菩薩如是安住菩薩歡喜地發諸大願起如是大方便如是大行以十願門爲首生如是等滿足十百千萬阿僧祇大願是菩薩任菩薩歡喜地起如是等願故何故名大願光明善根轉勝增廣故此校量菩薩願勝有二種勝聲聞辟支

佛一常勤修習無量行故二與一切衆生同行故同行者十盡句示現

經曰以十盡句成諸大願何等爲十所謂一衆生界盡二世界盡三虛空界盡四法界盡五涅槃界盡六佛出世界盡七如來智界盡八心所緣界盡九佛境界智入界盡十世間轉法轉智轉界盡如衆生界盡我願乃盡如世界盡如虛空界盡如法界盡如涅槃界盡如佛出世界盡如佛智界盡如心所緣界盡如佛境界智入界盡如世間轉法轉智轉界盡若彼界盡我願乃盡如是衆生界盡不盡我此善根亦不可

盡世界盡不盡虛空界盡不盡法界盡不盡涅槃界
盡不盡佛出世界盡不盡如來智界盡不盡心所緣
界盡不盡佛境界智入界盡不盡世間轉法轉智轉
界盡不盡我此諸願善根亦不可盡

論曰於中衆生界盡是總世界盡乃至智轉界盡
是別何等是衆生界衆生界盡故何處任世界盡
故所有虛空界虛空界盡故說何法教化法界盡
故隨化衆生置何處涅槃界盡故佛出世界盡故
以何方便善巧如來智界盡故復隨所緣心緣界
盡故復隨以何界佛境界智入界盡故此事已說

盡者示現不斷盡非念念盡故此九種盡略說三
種三轉示現此十盡句增上力故諸佛以此力常
爲衆生作利益故如是已說願按量勝云何行按
量勝

經曰諸佛子菩薩決定發如是諸大願已則得調順
心柔輒心如是則成信者信諸佛如來本所行入集
諸波羅蜜而得增長善成就諸地具足無畏力不共
佛法不壞故不可思議佛法無中無邊如來境界起
無量行門諸如來境界入信成就果舉要言之信一
切菩薩行乃至得如來智地說加故

論曰發如是諸大願已則得調順心者彼諸善根
中得自在勝故柔輒心者得勝樂行故如是則成
信者於中本行入者從菩薩行入乃至成菩提覺
故中信菩薩行所攝本行入有二種相一云何菩
薩行二云何次第成如經集諸波羅蜜而得增長
故善成就諸地故此菩薩所攝本行入有六種勝
是故信勝一者外道魔怨聲聞緣覺對治等勝如
經具足無畏力不共佛法不壞故二者不思議神
通力上勝如經不可思議佛法故三者不離深勝
如經無中無邊如來境界起故四者一切種智勝

如經無量行門諸如來境界入故五者離勝一切
煩惱習常遠離故如經信成就果故復略說彼菩
薩本行入示現如經舉要言之信一切菩薩行乃
至得如來智地說加故說者所說加者證故此菩
薩三種觀於諸衆生起大慈悲一遠離最上第一
義樂二具足諸苦三於彼二顛倒云何遠離最上
第一義樂

經曰諸佛子彼菩薩作是念諸佛正法如是甚深如
是寂靜如是寂滅如是空如是無相如是無願如是
無染如是無量如是上此諸佛法如是難得

論曰諸佛正法如是甚深者有九種一寂靜甚深
二寂滅甚深三空甚深四無相甚深五無願甚深
六無染甚深七無量甚深八上甚深九難得甚深
寂靜者離妄計實有故妄計正取故寂滅者法義
定故空無相無願者三障對治解脫門觀故何者
三障一分別二相三取捨願故無染者離雜染法
觀故無量者不可筭數不可思量生善根觀故上
者依自利他利增上智觀故難得者三阿僧祇劫
證智觀故云何具足諸苦

經曰而諸凡夫心墮邪見爲無明癡闇蔽其意識常

立憍慢幢墮在念欲渴愛網中隨順諂曲林常懷嫉
妬而作後身生處因緣多集貪欲瞋癡起諸業行嫌
恨猛風吹罪心火常令熾然有所作業皆與顛倒相
應隨順欲漏有漏無明漏相續起心意識種子

論曰而諸凡夫心墮邪見者邪見有九種一者蔽
意邪見如經爲無明癡闇蔽其意識故二者憍慢
邪見如經常立憍慢幢故三者愛念邪見如經墮
在念欲渴愛網中故四者諂曲心邪見如經隨順
諂曲林故五者嫉妬行邪見如經常懷嫉妬而作
後身生處因緣故六者集業邪見如經多集貪欲

瞋癡起諸業行故七者欲心熾然邪見如經嫌恨
猛風吹罪心火常令熾然故八者起業邪見如經
有所作業皆與顛倒相應故九者心意識種子邪
見如經隨順欲漏有漏無明漏相續起心意識種
子故是中蔽意邪見憍慢邪見愛念邪見此三邪
見依法義妄計如是次第諂曲心邪見嫉妬行邪
見此二邪見於追求時心行過故嫉者於身起邪
行故妬者於資財等是故生生之處墮卑賤中形
貌鄙陋資生不足故第六集業邪見愛諸受時憎
愛彼二顛倒境界故第七吹心熾然邪見於怨恨

時互相追念欲起報惡業故第八起業邪見於作
惡時迭相加害故第九心意識種子邪見於作善
業時所有布施持戒修行善根等業皆是有漏故
經曰於三界地復有芽生所謂名色共生不離此名
色增長已成六入聚成六入已內外相對生觸觸因
緣故生受深樂受故生渴愛渴愛增長故生取取增
長故復起後有有因緣故有生老死憂悲苦惱如是
衆生生長苦聚是中皆空離我我所無知無覺如草
木石壁又亦如響然諸衆生不知不覺而受苦惱
論曰是中因緣有三種一自相從復有芽生乃至

於有二同相謂生老病死等過三顛倒相離我我所等自相者有三種一者報相名色共阿黎耶識生如經於三界地復有芽生所謂名色共生故名色共生者名色共彼生故二者彼因相是名色不離彼依彼共生故如經不離故三者彼果次第相從六入乃至於有如經此名色增長已成六入聚成六入已內外相對生觸觸因緣故生受深樂受故生渴愛渴愛增長故生取取增長故復起後有有因緣故有生老死憂悲苦惱如是衆生生長苦聚故是中離我我所者此二示現空無知無覺者

自體無我故彼無知無覺示非衆生數動不動寧如經如草木石壁又亦如響故因緣相似相類法故云何於彼二顛倒如經然諸衆生不知不覺而受苦惱故

經曰菩薩如是見諸衆生不離苦聚是故卽生大悲智慧是諸衆生我應教化令任涅槃畢竟之樂是故卽生大慈悲智慧

論曰云何具諸苦聚云何遠離最上第一義樂此先已說示現大慈悲等故

經曰諸佛子菩薩摩訶薩隨順如是大慈悲法住在

初地以深妙心於一切物無所憍惜以智求佛大妙智故修行大捨卽時所有可施之物皆悉能捨所謂一切財穀庫藏等捨或以金銀摩尼真珠琉璃珂貝磲磔碼碯生金等捨或以寶莊嚴具瓔珞等捨或以象馬車乘輦輿等捨或以寺舍園林樓觀流泉浴池等捨或以奴婢僮僕等捨或以國土聚落城邑王都等捨或以妻子男女等捨或以一切所愛之事皆悉能捨或以頭目耳鼻肢節手足一切身分等捨如是一切可捨之物而不憍惜唯求無上佛智慧故而行大捨如是菩薩摩訶薩任於初地能成大捨

論曰是時所有可施之物皆悉能捨者求佛無上大妙智故是中一切物者略有二種一外二內外者復有二種一所用二貯積如經所謂一切財穀庫藏等故如是次第於中廣有八種從金銀等乃至一切所愛之事內者自身所攝是外事捨中初捨是總餘九捨是別依二種喜一藏攝喜二利益喜藏攝喜者謂金銀等利益喜者復有八種一者嚴飾利益喜謂寶莊嚴等二者代步利益喜謂象馬等三者戲樂利益喜謂園林樓觀等四者代苦利益喜謂奴婢等五者自在利益喜謂國土聚落

等六者眷屬利益喜謂妻子等七者堅著利益喜
謂一切所愛等八者稱意利益喜謂頭目耳鼻等
經曰菩薩如是以大施心救一切衆生故轉轉推求
世間出世間利益勝事彼推求利益勝事時心不疲
倦是故菩薩成不疲倦心成不疲倦已於一切經論
心無怯弱是名成一切經論智如是成一切經論智
已善能籌量應作不應作於上中下衆生隨宜隨宜
而行隨力隨成是故菩薩成就世智成世智已知時
知量慙愧莊嚴修習自利利他之道是故菩薩成慙
愧莊嚴如是行中精勤修行得不退不轉力如是菩

薩成堅固力得堅固力已勤行供養諸佛隨所聞法
如說修行諸佛子是菩薩悉知已起如是清淨諸地
法所謂信悲慈捨不疲倦知諸經論善解世法慙愧
堅固力供養諸佛如說修行

論曰是中依此世智隨宜隨宜而行者如論中說
隨自己力隨彼能受故依慙愧知時知量者示三
種時一者念時二者日夜時三者所作必得不斷
時依堅固力如是彼行中者如上所說信等故精
勤修行者有二種一不退力不捨行故二不轉力
精進不息故供養諸佛如說修行者有二種一利

養供養二修行供養此十種行顯二種勝成就一
深心成就謂信悲慈等二修行成就謂捨不疲倦
知諸經論善解世法慙愧堅固力供養諸佛如說
修行於中依自利行謂信能信菩薩行故諸佛
法求必能得故依利他行所謂慈悲能安隱與樂
心故捨者以財攝他行故不疲倦者自攝法行故
知諸經論善解世法者以法攝他行故餘有三行
攝護信等一者不著行以慙愧對治障信等不著
行故二者不動行有堅固力信等不可動故三者
修行彼垢清淨依上行供養諸佛攝信等善根故

是中有二種供養故得二種身一者上妙身所可
見者心生敬重利益不空故二者調柔心自性善
根成就樂行法故前所說三十句從信增上等乃
至常求上上勝道得清淨地法今此十句從信等
乃至供養諸佛盡是障地淨法是名修行較量勝
云何果利益較量勝

經曰諸佛子是菩薩住此菩薩歡喜地已多見諸佛
以大神通力大願力故見多百佛多千佛多百千佛
多百千那由他佛多億佛多百億佛多千億佛多百
千億佛多百千億那由他佛以大神通力大願力故

是菩薩見諸佛時以上心深心供養恭敬尊重讚嘆
衣服飲食卧具湯藥一切供具悉以奉施以諸菩薩
上妙樂具供養衆僧以此善根皆願廻向阿耨多羅
三藐三菩提是菩薩因供養諸佛故成教化利益衆
生法是菩薩多以二攝攝取衆生所謂布施愛語後
二攝法但以信解力行未善通達是菩薩十波羅蜜
中檀波羅蜜增上餘波羅蜜非不修集隨力隨分是
菩薩隨所供養諸佛教化衆生皆能受行清淨地法
如是如是彼諸善根皆願廻向薩婆若轉復明淨調
柔成就隨意所用諸佛子譬如金師善巧鍊金數數

入火如是如是轉復明淨調柔成就隨意所用諸佛
子菩薩亦復如是如是如是供養諸佛教化衆生皆
能修行清淨地法正修行已如是如是彼諸善根皆
願廻向薩婆若轉復明淨調柔成就隨意所用

論曰果利益较量勝有四種一調柔果利益勝二
發趣果利益勝三攝報果利益勝四願智果利益
勝調柔果利益勝者金相似法信等善法猶如真
金數數入火者有三種入一功德入供養佛僧故
二悲心入教化衆生故三無上果入願廻向大菩
提故以大神通力見諸佛者以勝神通力見色身

佛大願力者以內正願力見法身佛多百佛乃至
百千億那由他佛者方便善巧示現多佛顯多數
故供養者有三種一恭敬供養謂讚歎等顯佛功
德故二尊重供養謂禮拜等三奉施供養謂華香
塗香末香旛蓋等以諸菩薩上妙樂具者是諸菩
薩所有世間不共之物具足奉施一切衆僧故云
何發趣果利益勝

經曰復次諸佛子菩薩摩訶薩住此菩薩歡喜地於
初地中諸相得果應從諸佛菩薩善知識所推求請
問成地諸法無有狀足如是菩薩住初地中應從諸

佛菩薩善知識所推求請問第二地中諸相得果成
地諸法無有狀足如是第三第四第五第六第七第
八第九第十地中諸相得果應從諸佛菩薩善知識
所推求請問成十地法無有狀足是菩薩善知識諸地
障對治善知地成壞善知地相善知地得修善知地
清淨分善知地地轉行善知地地住處善知地地技
量勝智善知地得不退轉善知一切菩薩地清淨轉
入如來智地諸佛子菩薩如是善起地相發於初地
不任意成乃至轉入十地無障碍故以得十地智慧
光明故能得諸佛智慧光明諸佛子譬如善巧導師

多將人衆向彼大城未發之時應先問道中利益諸事復問道中退患過咎復問道處中間勝事復問道處中間退患過咎具道資糧作所應作推求請問未發初處是大導師乃至善知到彼大城未發初處此導師能以智慧思惟籌量具諸資用令無所乏正導衆人乃至得到大城於嶮道中免諸患難身及衆人皆無憂惱諸佛子菩薩摩訶薩善巧導師亦復如是住於初地善知地障對治乃至善知一切菩薩地清淨轉入如來智地爾時菩薩具大福德助道資糧善擇智慧助道欲將一切衆生向薩婆若大城未發初

處應先問道功德復問諸地退患復問道處中間勝事復問道處中間退患具大功德智慧資糧作所應作應從諸佛菩薩善知識所推求請問未發初處是菩薩善知地障對治乃至善知能到薩婆若大城未發初處菩薩如是智慧分別具大功德智慧資糧將一切衆生如應教化出過世間嶮難惡處乃至令住薩婆若大城不爲世間生死嶮過所染身及衆生無諸衰惱諸佛子是故菩薩摩訶薩常應心不疲倦勤修諸地業勝智本行諸佛子是名略說菩薩摩訶薩入初菩薩歡喜地門廣說則有無量百千萬

億阿僧祇事

論曰諸相者隨諸地中所有諸障及對治相故得者證出世間智故果者因證智力得世間出世間智故成地諸法者所謂信等爲滿足彼故有五種方便一觀方便二得方便三增上方便四不退方便五盡至方便觀方便者障對治成壞善巧如經是菩薩善知諸地障對治故善知地成壞故十種地障對治故名爲十地如本分中說如是次第集故成散故壞得方便者欲入方便已入方便彼勝進方便如經善知地相故善知地得修故善知地

清淨分故增上方便者地地轉行地地任處地地增長善巧如經善知地地轉行故善知地地住處故善知地地較量勝智故不退方便者如經善知地得不退轉故盡至方便者菩薩地盡入如來地善巧如經善知一切菩薩地清淨轉入如來智地故諸佛子譬如善巧導師多將人衆向彼大城者令得正行故於中導師者有二種方便一者不迷道方便於道路中是利是退患於道路處是勝是過咎皆善巧知如經先問道中利益諸事故復問道中退患過咎故復問道處中間勝事故復問道

處中間退患過咎故二者資具利益方便如經具道資糧作所應作故云何攝報果利益勝

經曰菩薩摩訶薩住此初地多作閻浮提王豪貴自在常護正法能以大施攝取衆生善除衆生慳貪妬嫉之垢常行大捨而無窮盡所作善業布施愛語利益同事是諸福德皆不離念佛不離念法不離念僧不離念諸菩薩不離念菩薩行不離念諸波羅蜜不離念十地不離念不壞力不離念無畏不離念佛不共法乃至不離念具足一切種一切智智常生是心我當於一切衆生中爲首爲勝爲大爲妙爲微妙爲

上爲無上爲導爲將爲師爲尊乃至爲一切智智依止者諸佛子是菩薩摩訶薩若欲捨家勤行精進於佛法中便能捨家妻子五欲得出家已勤行精進於一念間得百三昧得見百佛知百佛神力能動百佛世界能入百佛世界能照百佛世界能教化百佛世界衆生能任壽百劫能知過去未來世各百劫事能善入百法門能變身爲百於一一身能示百菩薩以爲眷屬

論曰攝報果利益勝者有二種一在家果二出家果在家果復有二種一者上勝身閻浮提王等如

經菩薩摩訶薩住此初地多作閻浮提王豪貴自
在常護正法故二者上勝果善巧調伏慳貪嫉妬
等如經能以大施攝取衆生善除衆生慳貪嫉妬
垢等能以大施攝取衆生者自行布施善勸他施
攝取衆生善轉衆生慳嫉之垢方便善巧以四攝
法攝取衆生故不離念佛等者示現不離自利益
如是諸念於事中行已成大恭敬除諸妄想此念
略有四種一者上念念三寶故二者同法念念諸
菩薩故三者功德念念自身他身菩薩行自體轉
勝故四者求義念念諸力等此是真實究竟故何

者是上念念佛等念佛法等故於施者受者財物
及菩提不生分別不取著故如是一切所作業中
作者不著境界不著作事不著果報不著以此一
切諸行皆願迴向大菩提故爲上首者有二種一
者勝首光明功德故二者大首獨無二故勝者有
二種一者妙智自在勝故二者微妙離一切煩惱
自在勝故大者有二種一者上無與等故二者無
上無能過故如是顯示自體功德故導者於阿含
中分別法義正說故將者令他證得義滅諸煩惱
故師者教授令入正道故乃至一切智智依止者

以大菩提道教化故是名在家菩薩攝報果利益
勝復次出家菩薩禪定勝業勝業有二種一者三
昧勝所謂於一念間得百三昧得三昧自在力故
二者三昧所作勝謂見百佛等以得是三昧故於
十方諸佛及佛所加諸菩薩所修習智慧故能動
百佛世界者令可化衆生生正信故能入百佛世
界能照百佛世界能教化百佛世界衆生者往至
及見正化衆生故能住壽百劫者攝取勝生故能
知過去未來世各百劫事者化諸衆生作離惡上
首說善惡業道故能善入百法門者爲增長自智

慧思惟種種法門義故能變身爲百於一一身能
示百菩薩以爲眷屬者多作利益速疾行故云何
願智果利益勝

經曰若以願力自在勝上菩薩願力示現過於此數
示種種神通或身或光明或神通或眼或境界或音
聲或行或莊嚴或加或信或業是諸神通乃至無量
百千萬億那由他劫不可數知

論曰於中身者是一切菩薩行根本所依故依彼
身故有光明及神通依光明有天眼以有天眼見
前境界一切眼有五種應知依神通有音聲及行

莊嚴加信等音聲者應彼言說故行者徧至十方
故莊嚴者作種種應現故加者神力加彼故信者
依三昧門現神通力隨衆生信利益成就故業者
依慧眼所攝陀羅尼門現說法故略說一切諸地
各有因體果相應知

十地經論卷第三

較論

第十一紙

一行住南藏作者十五行以爲眷屬起至大願共少三行南多三行

十地經論第三卷計字一萬零一百弘法會松江信士徐爾茲施寫銀五錢零五厘所先室宋氏淨根塵而入法界遊樂土以悟無生信士徐海承施刻併板紙銀四兩五錢五分所先妣宋氏凡身願淨法性恒明蓮邦不退永證菩提崇禎甲申孟夏松江弘法會貴州赤水釋繼慶較識

十地經論卷第四

天 親 善 薩 造

元魏三藏法師菩提留支奉詔譯

○離垢地第二

論曰菩薩如是已證正位依出世間道因清淨戒
說第二菩薩離垢地此清淨戒有二種淨一發起
淨二自體淨發起淨者說十種直心

經曰爾時金剛藏菩薩摩訶薩言諸佛子若菩薩已
具足初地欲得第二地者當生十種直心何等爲十
一直心二柔軟心三調柔心四善心五寂滅心六真

心七不雜心八不恡望心九勝心十大心菩薩生是
十心得入第二菩薩離垢地

論曰十種直心者依清淨戒直心性戒成就隨所
應作自然行故直心復有九種一者柔輒直心共
喜樂意持戒行故二者調柔直心自在力故性善
持戒煩惱不雜故三者善直心守護諸根不誤犯
戒猶如良馬性調伏故四者寂滅直心調伏柔輒
不生高心故五者真直心能忍諸惱如真金故六
者不雜直心所得功德不生厭足依清淨戒更求
勝戒樂寂靜故七者不恡望直心不願諸有勢力

自在故八者勝直心爲利益衆生不斷有願故九
者大直心隨順有果而不染故自體淨者有三種
戒一離戒淨二攝善法戒淨三利益衆生戒淨離
戒淨者謂十善業道從離殺生乃至正見亦名正
受戒淨攝善法戒淨者於離戒淨爲上從菩薩作
是思惟衆生墮諸惡道皆由十不善業道集因緣
乃至是故我應等行十善業道一切種清淨故利
益衆生戒淨者於攝善法戒爲上從菩薩復作是
念我遠離十不善業道樂行法行乃至生尊心等
經曰諸佛子菩薩住菩薩離垢地自性成就十善業

道遠離一切殺生捨棄刀杖無瞋恨心有慚有愧具足憐愍一切衆生生安隱心慈心是菩薩尚不惡心惱諸衆生何況於他衆生起衆生想故起重心身行加害

論曰說十善業道遠離一切殺生者示現遠離勝利益勝故依離殺生有三種離一者因離如經捨棄刀杖無瞋恨心有慚有愧具足憐愍故二者對治離如經於一切衆生生安隱心慈心故三者果行離如經尚不惡心惱諸衆生何況於他衆生起衆生想故起重心身行加害故於中殺生有二種

因一受畜因二起因受畜因有二種所謂刀杖刀者斫截事杖者捶打事如經捨棄刀杖故乃至咒術諸藥能殺之具悉皆遠離起因有二種所謂貪瞋爲財利故造諸惡業乃至沒命心無耻悔對治是等如經有慚有愧故爲貪衆生捕養籠繫令生苦惱對治是等如經具足憐愍故離此二種故言因離對治離有二種一者安隱心於一切衆生而作利益以善法教化令住善道涅槃因故二者慈心令彼衆生得人天報涅槃樂果故如經於一切衆生生安隱心慈心故如是於因果中不顛倒求

離愚癡心殺生祭祠等對治者卽名爲離故名對
治離彼能離故言衆生者示諸衆生非常非斷隨
命根因緣乃至現得壽命住世死則依業煩惱力
未來還生故果行離有二種一者微細心念害故
二者麤重身行惱害故如經是菩薩尚不惡心惱
諸衆生何況於他衆生起衆生想故起重心身行
加害故於中麤行有五種一者身如經他故二者
事如經衆生故三者想如經衆生想故四者行如
經故起重心故五者體如經身行加害故

經曰離諸劫盜資生之物常自滿足不壞地財若物

屬他他所事他守護想不生盜心是菩薩乃至草
葉不與不取何況其餘資生之具

論曰依離劫盜有三種離一因離二對治離三果
行離因離者自資生不足此對治如經資生之物
常自滿足故對治離者所謂布施於自資生捨而
不著以無貪故不壞當來資生如經不壞他財故
果行離者有二種一者微細物不與不取二者麤
重物不與不取此五種示現一者身如經若物屬
他故二者事如經他所事故三者想如經他守
護想故四者行盜心取故如經不生盜心故五者

體所謂微塵如經乃至草葉不與不取何況其餘
資生之具故

經曰離於邪姪自足妻色不求他妻他守護女人及
以他妻姓親標護戒法所護是菩薩乃至不生貪求
念想之心何況彼此二形從事况復非處

論曰依離邪姪有三種離一因離二對治離三果
行離因離者自妻不足此對治如經自足妻色故
對治離者現在梵行淨故不求未來妻色如經不
求他妻故果行離者有二種一者微細如經所謂
心中二者麤重謂身相中身相有三種一不正二

非時三非處不正者他守護女共不共等共者他
守護故不共者他妻故如經他守護女人及以他
妻故姓親標護者所謂父母親族姓護及已許他
標識所護故如經姓親標護故女人者示現遠離
非衆生鼓女名故非時者謂修梵行時如經戒法
所護故非處者謂非道行姪如經况復非處故細
麤者謂意業身業二種遠離故如經乃至不生貪
求念想之心何況彼此二形從事故
經曰離於妄語常作實語諦語時語是菩薩乃至夢
中不起覆見忍見無心欲作誑他語何況故妄語

論曰依離妄語有二種離一對治離二果行離對
治離者卽是因離何以故彼身業有二種離妄語
中無外事故復無異因故如離殺生中受畜因有
二種謂刀杖外事如彼中說離棄捨刀杖故離妄
語中無後身業二種外事故無異因者殺生因貪
瞋癡等妄語因者謂誑他心遠離彼故卽實語成
如是實語對治誑他心卽是因離依彼生此故言
無異因如是對治離卽是因離復對治離有三種
一者隨想語如經常作實語故二者善思量如事
語如經諦語故三者知時語不起自身他身衰惱

故如經時語故果行離者一細二麤如經是菩薩
乃至夢中不起覆見忍見無心欲作誑他語何況
故作妄語夢中者是細故作者是麤覆見忍見易
解智見名爲見

經曰離於兩舌無破壞心不恐怖心不惱亂心此聞
不向彼說此壞故彼聞不向此說彼壞故不破同意
者已破者不令增長不喜離別心不樂離別心不樂
說離別語不作離別語若實若不實
論曰依離兩舌有二種離一對治離二果行離對
治離者謂不破壞行一者心二者差別隨其所聞

論

地論

六

雜

往異處說此二種明心受憶持口業言說破壞心
故如經此聞不向彼說此壞故彼聞之向此說彼
壞故差別者有三種一身壞二心壞三業壞身壞
有二種一未壞二已壞此對治如經不破同意者
已破者不令增長故心壞亦有二種一未破者欲
破二已破者隨喜此對治如經不喜離別心故不
樂離別心故業壞亦有二種一細二麤實不實語
此對治如經不樂說離別語不作離別語若實若
不實故

經曰離於惡口所有語言侵惱語麤穢語若他語令

他嗔恨語現前語不現前語鄙惡語不斷語不喜聞
語聞不悅語嗔惱語心火能燒語心熱惱語不愛語
不樂語不善自壞身亦壞他人語如是等語皆悉捨
離所有語言美妙悅耳所謂潤益語軟語妙語喜聞
語樂聞語入心語順理語多人愛念語多人喜樂語
和悅語心徧喜語能生自心他心歡喜敬信語常說
如是種種美妙語
論曰依離惡口有二種離一果行離二對治離果
行離者謂損他語能令他嗔如經侵惱語麤穢語
若他語令他嗔恨語故此句次第以後釋前此等

義一名異復有相對語不相對語麤惡語常行故
如經現前語不現前語鄙惡語不斷語故於中現
前語者麤而不斷不現前語者微而有斷如是說
者與戒相違能生他苦令他瞋故如經不喜聞語
聞不悅語故作不利益語因瞋妬心起令他戒相
違如經瞋惱語故令他瞋惱有二種無饒益事一
未起瞋者能令生瞋聞時憶時不愛不樂冒中閉
塞故如經心火能燒語心熱惱語不愛語不樂語
故二者已有同意樂事自身失壞令他失壞如經
不善自壞身亦壞他人語故離如是等惡語故言

果行離對治離者謂潤益語於中有二種一者不
麤不疾語二者可樂語如經輕語妙語故是中不
麤不疾者戒分所攝受行不斷故喜者名爲可樂
故可樂有二種一者樂可樂二者安隱可樂樂者
隨順人天故安隱者隨順涅槃城如經喜聞語樂
聞語入心語順理語故又復怨親中人聞時憶時
能生歡喜如經多人愛念語多人喜樂語故此語
如是能作二種益一者他未生瞋恨令其不生
歡喜故復能生三昧故二者未生親友令生故自
身現故令他現作故如經心和悅語心徧喜語能

生自心他心歡喜敬信語常說如是種種美妙語
故

經曰離於綺語常善思語時語實語義語法語順道
語毗尼語隨時籌量語善知心所樂語是菩薩乃至
戲笑尚不綺語何況故作綺語

論曰依離綺語有二種離一對治離二果行離對
治離者善知言說時依彼此語勸發憶念修行若
見非善處衆生令捨不善安住善法彼時教化語
故如經常善思語故時語故復不顛倒語依展轉
教誨隨順修行時義言法言故如經實語義語法

語故復依展轉舉罪滅諍學行時如法語及阿含
語如經順道語毗尼語故復依攝受語說法攝受
修行如威儀住語故譬喻順義語故如經隨時籌
量語善知心所樂語故果行離有二種一細二麤
遠離此二故言果行離細麤者如經是菩薩乃至
戲笑尚不綺語何況故作綺語故

經曰離於貪心於他所有一切財物他所財不生
貪心不求不願不生貪心

論曰依不貪有三種一事二體三差別事者攝受
用於中有二種一已攝受用二攝護想如經於他

所有一切財物故體者有二種一所用事謂金銀等二資用事謂飲食衣服等如經他所用財故不貪性者對治貪心故如經不生貪心故此差別對治三種貪三種貪者一欲門行二得門行三奪門行對治是等如經不求不願不生貪心故於中初二網第三癩

經曰離於瞋心於一切衆生常起慈心安隱心憐愍心樂心利潤心攝饒益一切衆生心所有瞋恨妬害妄想垢等悉皆遠離所有一切隨順慈悲善修成就一切行故

論曰依離瞋障對治爲五種衆生說一於怨讐所生慈愍心如經常起慈心故二於惡行衆生所如經生安隱心故三於貧窮乞匄及若衆生所如經生憐愍心樂心故四於樂衆生所煩惱染著處如經利潤心故五於發菩提心衆生所無量利益行中勤勞疲倦故如經攝饒益一切衆生心故此慈心等有六種障此非分別亦非一一對於未生怨者能生已生者隨順增長未生親者令不生已生者令不增長自身中善法未生者令不生已生者令減於不善法未生者能生已生者令增長於他

身中不愛事未生者令生已生者令增長愛事未
生者令不生已生者不令隨順如經所有瞋恨妬
害妄想妬等皆悉遠離故此修多羅文句次第說
此瞋恨等無量惡行根本故言等彼悉捨離故餘
隨所念一切盡以慈心利益如經所有一切隨順
慈悲善修成就一切行故
經曰離於邪見隨順正道捨於種種占相吉凶離惡
戒見修正直見不奸欺不諂曲決定誠信佛法僧寶
菩薩如是日夜常護十善業道
論曰依正見有七種見對治何者七種見一者異

乘見此對治如經隨順正道故二者虛妄分別見
三者戒取淨見此對治如經捨於種種占相吉凶
離惡戒見故惡戒見者自取所見故四者自謂正
見此對治如經修正直見故五者覆藏見六者詐
現不實見此對治如經不奸欺不諂曲故七者非
清淨見謂世間見此對治如經決定誠信佛法僧
人寶故如是已說一切種離戒復說離戒增上清淨
不斷不闕常護持故如經菩薩如是日夜常護十
善業道故如是具足一切種離戒性成就故復示
不斷不闕故次說攝善法戒淨謂菩薩作是思惟

等修多羅次第說

經曰菩薩作是思惟一切衆生墮諸惡道皆由不離十不善業道集因緣故是故我當先住善法亦令他人住於善法何以故若人自不行善不具善行爲他說法令住善者無有是處

論曰墮諸惡道者有三種義一者乘惡行在故二者依止自身能生苦惱故三者常墮種種苦相處故何故言十不善業道謂攝到一切惡果數故言十不善業道攝到一切惡果數者說十不善業道故數者攝取十名故惡者不善故果者墮地獄畜

生餓鬼等可毀故到者攝取業故集因者受行故菩薩如是遠離無因顛倒因善解衆生自行惡業住非法處不能遠離菩薩思惟深寂靜已欲救彼衆生自知堪能復觀察障對治不善業道及果善業道及果及上上清淨起增上心求學修行攝善法戒清淨行故

經曰是菩薩復深思惟行十不善業道集因緣故則墮地獄畜生餓鬼行十善業道集因緣故則生人中乃至生有頂處又是上十善業道與智慧觀和合修行其心狹劣故心畏三界故遠離大悲故從他聞

聲而通達故聞聲意解成聲聞乘

論曰智慧觀者實相觀故惡道者是若不善業道是集彼離是滅彼對治是道又善道者是苦善業道是集離彼使是滅彼對治是道智慧同觀修行無分別聲聞有五種相一因集二畏苦三捨心四依止五觀如是狹劣等是聲聞心因集者修行微少善根故但依自身利益如經其心狹劣故畏苦者如經心厭畏三界故捨心者捨諸衆生如經遠離大悲故依止者依師教授故觀者念音聲故何者音聲我衆生等但有名故如是彼者從音聲解

故入衆生無我非法無我如經從他聞聲而通達

故聞聲意解成聲聞乘故

經曰又是上十善清淨業道不從他聞故自正覺故不能具足大悲方便故而能通達深因緣法成辟支佛乘

論曰辟支佛有三種相一者自覺二不能說法三觀少境界不假佛說法及諸菩薩唯自覺悟如經不從他聞故自正覺故不起心說不堪說法故如經不能具足大悲方便故觀微細因緣境界行故如經而能通達深因緣法成辟支佛乘故因集畏

論
苦捨衆生辟支佛亦有此法所有勝事此中已說
經曰又是上上十善業道清淨具足其心廣大無量
故於諸衆生起悲愍故方便所攝故善起大願故不
捨一切衆生故觀佛智廣大故菩薩地清淨波羅蜜
清淨入深廣行成

論曰菩薩有四種相一者因集二者用三者彼力
四者地依一切善根起行故依一切衆生利益行
故大乘心廣無量故此是因集如經又是上上十
善業道清淨具足其心廣大無量故見諸衆生習
行苦因及受苦時起悲愍心依彼衆生利益是菩

薩用如經於諸衆生起悲愍故彼力者謂四攝法
如經方便所攝故地者有三種一者淨深心地十
大願得名如經善起大願故二者不退轉地得寂
滅行已不捨解脫衆生如經不捨一切衆生故三
者受大位地是故求證佛廣大智如經觀佛智廣
大故菩薩地清淨波羅蜜清淨入深廣行成此中
但說菩薩地廣成便足何故復說地淨波羅蜜淨
有上上清淨故第一法清淨故顯示菩薩深廣行
成第一義者波羅蜜義故

經曰又是上上十善業道一切種清淨十力力故集

一切佛法令成就故是故我應等行十善業道修行
一切種令清淨具足

論曰上上者有四種義顯上上事一者滅二者捨
三者方便四者無厭足不善業道共習氣滅故善
業自在成就故聲聞辟支佛捨故方便者於菩薩
乘善巧故餘殘無厭足故一切智中得自在智故
一切種令清淨故如經又是上上十善業道一切
種清淨故十力力故集一切佛法令成就故是故
我應等行十善業道修行一切種令清淨具足故
降伏魔怨小乘等上故顯示力佛法應知次上

依大悲利益衆生戒增上有五種義一者智二者
願三者修行四者集五者集果智者有三種相一
者時差別二者報果差別三者習氣果差別

經曰是菩薩復作是思惟此十不善業道上者地獄
因緣中者畜生因緣下者餓鬼因緣於中殺生之罪
能令衆生墮於地獄畜生餓鬼若生人中得二種果
報一者短命二者多病劫盜之罪亦令衆生墮於地
獄畜生餓鬼若生人中得二種果報一者貧窮二者
共財不得自在邪淫之罪亦令衆生墮於地獄畜生
餓鬼若生人中得二種果報一者婦不貞良二者二

妻相諍不隨已心妄語之罪亦令衆生墮於地獄畜
生餓鬼若生人中得二種果報一者多被誹謗二者
恒爲多人所誑兩舌之罪亦令衆生墮於地獄畜生
餓鬼若生人中得二種果報一者得破壞眷屬二者
得弊惡眷屬惡口之罪亦令衆生墮於地獄畜生餓
鬼若生人中得二種果報一者常聞惡聲二者所有
言說恒有諍訟綺語之罪亦令衆生墮於地獄畜生
餓鬼若生人中得二種果報一者所說正語人不信
受二者所有言說不能辯了貪欲之罪亦令衆生墮
於地獄畜生餓鬼若生人中得二種果報一者貪財

無有厭足二者多求恒不從意瞋恚之罪亦令衆生
墮於地獄畜生餓鬼若生人中得二種果報一者常
爲他人求其長短二者常爲他人惱害邪見之罪亦
令衆生墮於地獄畜生餓鬼若生人中得二種果報
一者常生邪見家二者心恒諂曲諸佛子如是十不
善業道皆是衆若大聚因緣

論曰時差別者依不善業道因果上中下差別如
經是菩薩作是思惟此十不善業道上者地獄因
緣中者畜生因緣下者餓鬼因緣故前總觀不善
業道因今別觀報果一切諸惡處如經殺生之罪

能令衆生墮於地獄畜生餓鬼乃至邪見之罪亦
令衆生墮於地獄畜生餓鬼故習氣果者人中一
一各有二種果如經若生人中得二種果報一者
短命二者多病乃至若生人中得二種果報一者
常生邪見家二者心恒諂曲故是中時報差別者
示現苦深重故云何示現下者餓鬼中深故中者
復轉深故上者轉轉重深故習氣果差別者隨順
至善道中故總別合觀惡道中無量大苦如經諸
佛子如是十不善業道皆是衆苦大聚因緣云何
爲願

經曰菩薩復作是念我當遠離十不善業道樂行法
行

論曰願者復樂行大乘法作利益衆生義故攝善
法故如經菩薩復作是念乃至樂行法行故云何
修行

經曰菩薩遠離十不善業道安住十善業道亦令他
人住於十善業道

論曰修行者自住善法遠離彼障修行對治亦令
衆生住善法故如經菩薩遠離十不善業道乃至
亦令他人住於十善業道故云何爲集

經曰是菩薩復於一切衆生中生安隱心樂心慈心
悲心憐愍心利益心守護我心師心生尊心

論曰集者依增上悲復爲念衆生故生十種心復
次此心爲八種衆生故生一者於惡行衆生欲令
任善行故如經安隱心故二者於苦衆生欲令樂
具不盡故如經樂心故三者於怨憎衆生不念加
報如經慈心故四者於貧窮衆生欲令遠離彼苦
如經悲心故五者於樂衆生欲令不放棄如經憐
愍心故六者於外道衆生欲令現信佛法故如經
利益心故七者於同行衆生欲令不退轉如經守

護心故八者於一切攝菩提願衆生取如己身是
諸衆生卽是我身如經我心故生餘二心者觀彼
衆生乘大乘道進趣集具足功德如經師心故生
尊心故集果者勝悲所攝欲勝復次依增上顛倒
爲首於三種衆生一欲求二有求三梵行求欲求
衆生者有二種一受用時二追求時受用有三種
一受不共財二受無厭足財三受貯積財追求有
二種一追求現報習惡行故二追求後報習善行
故有求衆生亦有二種一者道差別二者界差別
梵行求衆生亦有二種一者邪見諸外道等二者

正見同法小乘等彼諸衆生趣如是道隨順對治
令住如所應處云何顛倒爲首
經曰菩薩復作此念是諸衆生墮於邪見惡意惡心
行惡道稠林我應令彼衆生行真實道住正見道如
實法中

論曰邪見者謂四顛倒此顛倒者二倒名爲惡意
專念行故二倒名爲惡心非專念行謂我淨想故
彼非正道稠林行因非正道者是諸煩惱稠林者
煩惱使故如經菩薩復作此念是諸衆生墮於邪
見惡意惡心行惡道稠林故彼諸衆生隨順對治

妙法正念正見出世間法如經我應令彼衆生行
真實道住正見道如實法中故云何受不共財
經曰是諸衆生共相破壞分別彼我常共鬪諍日夜
瞋恨熾然不息我應令彼衆生住於無上大慈中

論曰受不共財者互相破壞破壞有二種一對怨
於心中二鬪諍於言中如是破壞思念作報增長
行熾如經是諸衆生共相破壞乃至日夜瞋恨熾
然不息故對怨於心中分別彼我此言示現鬪諍
於言中常共鬪諍此言示現思念作報增長行熾
日夜瞋恨熾然不息此言示現彼諸衆生隨順對

治與大慈益如經我應令彼衆生住於無上大慈
中故云何受無厭足財

經曰是諸衆生心無厭足常求他財邪命自活我應
令彼衆生住於清淨身口意業正命法中

論曰受無厭足財者有二種一貪於心中二於身
口中斗秤妄語等方便奪故如經是諸衆生心無
厭足常求他財邪命自活故彼諸衆生隨順對治
清淨身口意業正命自活如經我應令彼衆生住
於清淨身口意業正命法中故云何受貯積財

經曰是諸衆生因隨逐貪欲瞋恚愚癡常爲種種煩

惱熾火之所燒然不能志求出要方便我應令彼衆
生滅除一切煩惱大火安置清涼無畏之處

論曰受貯積財者貪等因體過彼染著故於彼散
用起瞋心故彼寶翫受用中多樂境界數爲煩惱
火之所燒然過不見彼過無求出意如經是諸衆
生因隨逐貪欲瞋恚愚癡常爲種種煩惱熾火之
所燒然不能志求出要方便故彼諸衆生隨順對
治除一切煩惱置清涼處如經我應令彼衆生滅
除一切煩惱大火安置清涼無畏之處故云何追
求現報習諸惡行

經曰是諸衆生常爲愚癡闇冥妄見厚翳無明黑闇所覆入大黑闇稠林遠離智慧光明墮大黑闇處隨其所見到種種嶮道我應令彼衆生得無障礙清淨慧眼以是眼故知一切法如實相得不隨他一切如實無障礙智

論曰追求現報習惡行者既有愚癡闇冥妄見厚翳黑闇所覆過妄見樂故不見未來實果報過故亦不見現在實果報過故如經是諸衆生常爲愚癡闇冥妄見厚翳無明黑闇所覆故又愚癡者名爲闇冥故妄見者顛倒樂見故厚翳者不見未來

實果報過故黑闇者不見現在實果報過故是愚癡因滿足使事是過及遠離無漏智處故彼善行障順不善行故如經入大黑闇稠林故遠離智慧光明故稠林者是愚癡因使故大者滿足故受至大對過患如經墮大黑闇處故是中對者黑闇示現如闇中行處處障礙如是相似法故受大對事成至諸惡趣是故名墮多作罪因於臨終時見惡報想心生悔見過如經隨其所見到種種嶮道故見嶮道者悔見故見本罪相不能集彼對治正見隨其所見者於死時故彼諸衆生隨順對治以如

實法令得無障礙清淨慧眼如經我應令彼衆生
得無障礙清淨慧眼以是眼故知一切法如實相
得不隨他一切如實無障礙智故云何追求後報
習諸善行

經曰是諸衆生隨順世間生死嶮道墜地獄畜生餓
鬼深坑墮順入惡見網中爲種種愚癡稠林所覆隨
逐虛妄道行顛倒行常盲冥故遠離有智導師非出
要道處謂出要想隨逐魔道怨賊所攝遠離善巧導
師入魔意稠林遠離佛意我應拔濟彼諸衆生種種
諸苦度於世間嶮道艱難安置無畏處令任薩婆若

大城

論曰追求後報習善行者隨順嶮道過如經是諸
衆生隨順世間生死嶮道故彼嶮道有三種一自
體二障礙三者失自體者世間乏少善根本故障
礙者有八種一者求出而隨順世間墮三惡趣如
經將墜地獄畜生餓鬼深坑故二者入網於苦果
中妄生樂故如經隨順入惡見網中故三者黑闇
稠林所覆因彼癡使所覆故爲說苦因而不知覺
如經爲種種愚癡稠林所覆故四者行顛倒道捨
真實樂妄行邪道故如經隨逐虛妄道行顛倒行

故五者盲冥得果貪著愛欲所盲故如經常盲冥
故六者遠離導師生惡道中及放逸等過雖值佛
世而不見不聞故如經遠離有智導師故七者希
求涅槃而趣彼異處謂梵天等梵世間等以爲出
世正見如經非出要道處謂出要想故八者怨賊
行魔境界貪著諸欲劫功德盡令不集故如經隨
逐魔道怨賊所攝故失者有三種一者離善導師
依不善地如經遠離善巧導師故二者依止怨地
如經入魔意稠林故三者遠離作善知識地如經
遠離佛意故彼諸衆生隨順對治以如實法令出

世間任一切智地如經我應拔濟彼諸衆生種種
諸苦度於世間嶮道艱難安置無畏處令住薩婆
若大城故云何道差別

經曰是諸衆生爲大暴水波浪所沒隨順欲流有流
見流無明流隨順世間漂流沒大愛河在大駛流不
能正觀常有欲覺瞋覺惱覺惡行廣故愛見水中羅
刹所執順入欲林廻復求欲事中深愛著故我慢陸
地之所焦枯無能救者於六入聚落不能動發自離
善行無正度者我應於彼衆生生大悲心以善根力
而拔濟之令得無畏不染寂靜離諸恐怖住於一切

智慧寶洲

論曰有求衆生道差別者沒在大河過如經是諸
衆生爲大暴水波浪所沒故彼大暴水波浪有三
種一自體二起難三者失自體者有五種相一者
深無量水故如經隨順欲流有流見流無明流故
二者流隨順世間常流不斷如經隨順世間漂流
故三者爲愛水所沒如經沒大愛河故四者漂念
念不住不見岸故如經在大駛流不能正觀故五
者廣隨順欲等念覺廣故如經常有欲覺瞋覺惱
覺惡行廣故起難有四種一者執執著我我所窟

宅不能動離故如經愛見水中羅糾所執故二者
入迴先捨欲已還復轉入欲念中故如經順入欲
林迴復故三者中著於受用時求欲等樂著故如
經求欲事中深愛著故四者洲於用事時中我等
最勝三種我慢自高輕彼如經我慢陸地之所焦
枯故失者有三種一者無救失處惡道中無人濟
拔如經無能救者故二者無出意外失處善道中無
出離心如經於六入聚落不能動發故三者異處
去失生諸難處不值佛世如經自離善行無正度
者故彼諸衆生隨順對治以如實法令住一切智

一論
一也至命卷四
一四
一四
洲如經我應於彼衆生生大悲心以善根力而拔濟之令得無畏不染寂靜離諸恐怖住於一切智慧寶洲故云何界差別

經曰是諸衆生閉在世間牢獄之處衆多患苦多惱妄想愛憎繫縛憂悲共行愛鎖所繫入於三界無明稠林所覆我應令彼衆生遠離一切三界所著令住離相無礙涅槃

論曰有求衆生界差別者閉在牢獄過如經是諸衆生閉在世間牢獄之處故此牢獄過有五種隨逐應知一苦事二財盡三愛離四著縛五障礙此

示五種難差別一者無病難多種病苦妄想愁惱如經衆多患苦多惱妄想故二者資生難於愛不愛事中憎愛所縛如經愛憎繫縛故三者親難親愛離壞憂悲增長如經憂悲共行故四者戒難雖生色無色中暫離犯戒不勉戒行相違愛欲使縛如經愛鎖所繫故五者見難得世間智彼相違無明使之所覆蔽如經入於三界無明稠林所覆故彼諸衆生隨順對治以如實法令住離相無礙涅槃如經我應令彼衆生遠離一切三界所著令住離相無礙涅槃故云邪見諸外道等

經曰是諸衆生深著我相於五陰樛窟不能自出行
四顛倒依六入空聚常爲四大毒蛇之所侵惱爲五
陰怨賊之所殺害受此一切無量苦惱我應令彼衆
生離一切障礙令住空無我智道所謂涅槃滅一切
障礙

論曰邪梵行諸外道等者執取我相過此餘見根
本如經是諸衆生深著我相故彼諸衆生欲趣涅
槃城以有我故於五陰舍不能動發如經如五陰
樛窟不能自由故欲行正道以顛倒故行彼邪道
如經行四顛倒故依恃我想故趣涅槃虛妄我見

住六入聚如經依六入空聚故受老病死等諸苦
意欲遠離而不得離恒隨已身如經常爲四大毒
蛇之所侵惱故陰怨隨逐而不放捨如經爲五陰
怨賊之所殺害故常爲種種諸苦隨逐如經受此
一切無量苦惱故彼諸衆生隨順對治以如實法
離一切障令住涅槃如經我應令彼衆生離一切
障礙令住空無我智道所謂涅槃滅一切障礙故
云何正梵行同法小乘等

經曰是諸衆生小心狹劣不求大乘其心遠離無上
一切智智等有出行而樂聲聞辟支佛乘我應令彼

衆生安住微妙無上佛法深廣大意諸佛子菩薩如是隨順持戒力善能廣起方便行故

論曰正行梵行求小乘過此小乘意有二種一者小心佛法微妙廣大無量其心退沒而不能證故二者狹心於無量衆生作利益懈怠故如經是諸衆生小心狹劣不求大乘法故復依小乘心願過願小乘故如經其心遠離無上一切智智故修行過不定聚衆生實有大乘由法而修行小乘如經等有出行而樂聲聞辟支佛乘故彼諸衆生隨順對治以如實法令住微妙無上佛法廣大心故如

經我應令彼衆生安住微妙無上佛法深廣大意故依持戒行故得此戒力能作善法善巧起諸善行故如經諸佛子菩薩如是隨順持戒力善能廣起方便行故

經曰諸佛子是菩薩住此菩薩離垢地已多見諸佛以大神通力大願力故見多百佛多千佛多百千佛多百千那由他佛多億佛多百億佛多千億佛多百千億佛多百千億那由他佛以大神通力大願力故是菩薩見諸佛時以上心深心供養恭敬尊重讚歎衣服飲食卧具湯藥一切供具悉以奉施以諸菩薩

上妙樂具供養衆僧以此善根皆願廻向阿耨多羅三藐三菩提於諸佛所生上恭敬心復受十善法受善法已乃至得阿耨多羅三藐三菩提終不中失是菩薩於無量劫無量百劫無量千劫無量百千劫無量億劫無量百億劫無量千億劫無量百千億劫無量百千億那由他劫遠離嫉破戒垢心習行布施持戒清淨諸佛子譬如成鍊真金置礬石中煑已離一切垢轉復明淨諸佛子菩薩住此離垢地中亦復如是於無量劫乃至無量百千億那由他劫遠離嫉破戒垢心成就布施持戒清淨菩薩爾時於四攝

法中愛語偏多十波羅蜜中戒波羅蜜增上餘波羅蜜非不修集隨力隨分諸佛子是名略說菩薩摩訶薩第二菩薩離垢地菩薩住是地中多作轉輪聖王得法自在七寶具足有自在力能除一切衆生破戒等垢以善方便令諸衆生修行十善業道所作善業布施愛語利益同事是諸福德皆不離念佛念法念僧念菩薩念菩薩行念波羅蜜念十地念不壞力念無畏念不共佛法乃至不離念具足一切種一切智智常生是心我當於一切衆生中爲首爲勝爲大爲妙爲微妙爲上爲無上爲導爲將爲帥爲尊乃至爲

一切智智依止者諸佛子是菩薩摩訶薩若欲捨家
勤行精進於佛法中便能捨家妻子五欲得出家已
勤行精進於一念間得千三昧得見千佛知千佛神
力能動千佛世界能入千佛世界能照千佛世界能
教化千佛世界衆生能住壽千劫能知過去未來世
各千劫事能善入千法門能變身爲千於一一身能
示千菩薩以爲眷屬若以願力自在勝上菩薩願力
過於此數示種種神通或身或光明或神通或眼或
境界或音聲或行或莊嚴或加或信或業是諸神通
乃至無量百千萬億那由他劫不可數知

論曰此中果利益校量勝事者如初地說此地亦
如是有者同無者應知此中勝事者於無量劫遠
離慳嫉破戒垢心成就布施持戒清淨等諸事勝
故於初地中戒未淨故施亦未淨若爾何故初地
中說檀波羅蜜增上餘者不亦然彼檀波羅蜜等
此地中轉勝清淨故以離慳嫉破戒等垢是故此
地釋名離垢初地中金但以火鍊除外貪等麤垢
故說鍊金清淨今於此地復置礬石中煮除自體
明垢故自性真淨故說性戒清淨義

十地經論卷第四

十地經論卷第四計字一萬零五百

姑鑽輪金部筆合然此鉉施寫銀五錢二分半所

先室宋氏淨根塵入法界遊樂土以悟無生

信士徐洵承施刻併板紙銀四兩七錢三分所

先妣宋氏凡身頓淨法性恒明蓮邦不退永證菩

提

信士徐泄承閱 抱香菴祖瞻對

崇禎甲申仲夏松江弘法會貴州赤水釋繼慶



ノ
ノ
卅
五

52

